


# MWABA ÛMWÈPELÈ

## WÀ DIKUUKWILA

### ÛDÌ NZAMBI MUFÌLE

 Beetwabu mu dindà emu! Ndi ne disànkà dyà kwikala kaaba aka mu dindà emu. Nènku tudi ne disànkà, tusànkila bwobùmwe bunène ebu banyungùlùkile misambu yà kale yà diitabuuja eyi. Tudi banange aci. Kí mmwômò anyi? Cipungulujilu cyà *Amen* aci. Ki cidiYe ncyôci aci, Amen awu's, nwamònu's. Yèyè ùdi ne diyì dyà ndekeelu dyà kwamba.

<sup>2</sup> Mwva musòmbe mwaba awu nyiikilangana ne mulunda wanyì wa kale, Mwanèètù Brown, pàvwà misambu munkaci mwà kutungùnuka apu. Ki yèyè ne: “Mwanèètù Branham, ànu makèèlèlè awu, ki ungàmònukù cyùdi wamba aci.” Yèyè ne: “Bu bantu mwà kubwela ànu mu ciine cyùdi wamba aci,” yèyè ne, “nùnkù cipùmbishi cyònsò cyumuke mu njila.” Ncyà bushùwà menemene. Ncyà bushùwà. Ncyà bushùwà menemene. Bu nwènù ànu mwà kuCibàkula, mwà kuCyùmvwa. Nwamònu anyi?

<sup>3</sup> Mwà nyiikilangana ne mulunda wanyì mukesè, Ernie Fandler. Ngeela meeji ne bàmwè bàà kunùdi bàdi batèèlejila ku nshinga abu nebàvùluke Ernie, mwàkakùdimunaye mucìma, mwàkalombodiibwaye kùdi Mukalenge. Katu wàkula Anglais bìmpe to, cyanààna's mvwa kujingakù bwà yèyè kulwa kwambakù diyì kampànda. Kàdi yèyè ùdi ucyompakaja V yèndè ne W yèndè. Ûvwa ùnkonka ní mvwa muvùluke cikondo, kuvwa nku Shawano, kudiye musòmbele. Muntu wàkafwila mu masangisha, kukùlukaye pa nkwasà wèndè e kufwàye, Luthérien. Tètù e kupùwisha bantu bwònsò. Mèmè kwamba Diyì dyà Mukalenge pambidi pèndè, kwalukilaye ku mwoyi, ne kwalukilaye buludi ku mudimu. Um-hum. Kacya kabatu bacipwa mwoyi nànsha, mbajinge bwà twètù kwalukilakù kàbidi.

<sup>4</sup> Ndi muumvwe ne mu France, mu dindà emu, kudi beena France bapite pa binunu bibidi bàdi munkaci mwà kujila byàkudyà munda mwà matùkù mulongolongo, bwà twètù kulwa kutwala Mukenji ku France, mu France mwàmwa, ditunga dijimà dyà beena Mishòònyì, citùpà cyà beena Mishòònyì cyà ditunga dyà France. Ne pa nànkù tudi. . .

<sup>5</sup> Ûdi ùbanga ànu kwela bilòngò mpindyewu, ùcibangilaku cyanààna, cizubu cikaadi munkaci mwà kudikoka bwà blé wàmòna mwà kushaala mudyadija pambelu mpindyewu.

Nwamònu anyi? Pa nànkú shààlaayi ànu mu kaneemu, ikalaayi ànu nusambila. Nwamònu anyi? Vùlukàayi ne: “Aba bàdì bindila Mukalenge, bàdì bavwijulula makàndà àbò mapyamàpyà.”

<sup>6</sup> Mpindyewu, kudi... Mvwa... ndi ngenda nkulakaja bushùwà, ke mèmè kudyàmbidila ne: “Nèngìikalè... Nekwikalè ditabuluja dikwàbò, nèmmonè cikondo cikwàbò anyi?” Nènku vùlukàayi ànu ne, kuumukila ku wesètè nekùlwe mubàndi wa pa kabalú katòòke. Netùbande cyàkàbìdì mu kajila aka. Ncyà bushùwà. Patùdì ànu tudilongolola. Mmulayi, nudi numòna’s.

<sup>7</sup> Mpindyewu, ndi muswè kwambila Mwanèètù Leo... Mvwa ngàakula bwà Mwanèètù Wood makèèlèlè dilòòlò awu, mwanààbo wa balùme bu mudiye mwaba ewu. Mwanèètù Leo, bu wèwè ne kasùmbù kakesè kàdì katèèlejila ku téléfone mwaba awu mu dindà emu aku, Mwanèètù wa bakàjì Mercier, tatwèbè ùdì kaaba aka. Mvwa mumumòne makèèlèlè dilòòlò. Ùdì ùsanganyibwa mu citanda emu mwaba kampànda, ne ùdì umweka bîmpè ne bilenga byà njàjàmà.

<sup>8</sup> Mu dindà dyàkondopiibwayè mu tabernacle mwàmwa, kuvwa màsaamà àbìdì manène aa kansèrè, bàpunga ne lufù menemene, ne bùbìdì bwabù kondopiibwabù. Nènku tatwèndè, muntu mukulumpe mu disaamà dyà mwoyi mwimàne, wàkondopiibwa bwà butùmbì bwà Nzambi. Ne yèyè ùdì mu disangisha emu mwaba kampànda. Ncyèna mwà kumumòna munkaci mwà musùmbà wà bantu ewu mpindyewu to, kàdì yèyè ùvwa kaaba aka makèèlèlè dilòòlò.

<sup>9</sup> Myoyi yènù ayi nwènù bwònsò mu ditùnga dijimà; muneemu mu mwaba mulenga wa dikema ewu, wa mu Life Tabernacle ewu ku Shreveport, ne musùmbà wa bantu bùlà tètè bwà kàlaasà kàà Dyàlumuingu. Nudi bamanye’s, bu mèmè mwà kwikala musòmbele ku Shreveport, ncyèna ngamba cintu nànsha cimwè cyà cìlwisha muntu kampànda to, kàdì ewu mmufwànyine kwikala mwaba wùndì mufwànyine kulwa mu èkèleeziyà, mwaba ewu mene mu LifeTabernacle. Eci kí ndingumba to. Life Tabernacle, udi leelù ewu, tabernacle ùdì kàyi usungulujangana bilondeshile màngumba to. Mbapatuke mu dīgumba bwalu bavwa bangitabe mèmè ne Mukenji wùndì nyiisha ewu. Mwanèètù Jack Moore, mwanèètù wa balùme ne mulunda wanyì, ùvwa mwipata mu dīgumba adi ànu bwalu mmuswikakane naanyì. Nènku ndi ngeela meeji ne ùdì ukumbanyina kaneemu. Ncyà bushùwà. Nzambi amubènèshe. Ne nwéle byanza byèndè muulu mu disambila, ne nwitabuuja pàmwè nendè.

<sup>10</sup> Nènku mpindyewu Mwanèètù wa bakàjì Moore, ncyèna mmumòna kaaba nànsha kàmwè to, ùdì, èyo, lwà paanyimà apa, ùdì umweka bu mwànà wa bakàjì mutekete musòmbe mwab’awu mu dindà emu’s, ne bilàmbà bilenga ebi, bipiyabipyà byònsò, nùnkú ewu, bimweka bu bilàmbà byà Paasàkà. Nènku bìdì

bimweka... Mwanèètù Jack kavwa nànsha mumumanyè yèyè mwine to. Mpindyewu, mpindyewu Mwanèètù wa bakàjì Moore!

<sup>11</sup> Ncyà bushùwà ne nkuupangike Anna Jeanne ne Don, ne bônso baa kùdìbo abu. Ndi ne disànkà dyà kutwilàngàna ne Mwanèètù Nolan, mwena... umwe wa ku beena dyètù abu kaaba aka.

<sup>12</sup> Nènku Mwanèètù Ernie, mvwa mumulombe makèèlèlè awu ní uvwa mwà kwimbaku musambu awu wà *Amen*. Ndi naawu pa mukàbà wà mèyì, ne ndi muwupelule ne diwùtèèleteeleja, *Amen*. Ndi ngeela meeji ne yèyè ùdi ne dīyì didì diwùkùmbanyì; mubàtambe bakwàbò bwónsò. Ne Judy mukesè ewu, mèmè kumumòna; bàbìdì abu, bàdì bamweka ànu bu tuutù ne mwakunyèndè wa bakàjì. Ki mmwòmò anyì? Bàdì mulùme ne mukàjì. Tàngilàayi yónsò wa kudìbo, nwamònu's, kaa s'mbafwànàngàne ànu pyòpyopyò. Nwamònu anyì? Nènku mbabàka bakesè balenga bàà dikema. Mbwenà kwamba ne, nudi bamanye's, bàdì... Mwanèètù Palmer udi ufuma ku dibànda bibàndilu byà ngòlò awu, bóbò abu mmwanèndè wa bakàjì ne mukù wendè. Nènku aci... Yèyè ùdi bushùwà menemene bujaadiki bwa dikolesha dyèndè dīmpè dyà mwànà. Nènku ùdi kàbìdì ne bakwàbò's, bambi baselangane pààbò, ne bóbò aba ki batangadiki ne bàdì mu budimi bwàbò bwà bwambi, ne bakwàbò. Pa nànkù's bidi ànu bīmpè byà kacya's.

<sup>13</sup> Ncyèna mumòne Mwanèètù wa bakàjì Palmer to. Ncyà bushùwà ne, ncyèna mumanye ní ndi mufwànyìne kumumanya bu mèmè mwà kumumòna, anyì ncyèna mwà kumumanya to. Ùdi, pàmwàpa, mwaba kampànda (mu bushùwà bwà bwalu) mu disangisha emu. Lwà mu ndekeelu menemene mwàmwa; Nzambi àkubènèshèe, Mwanèètù wa bakàjì Palmer.

<sup>14</sup> Mwoyi wànyì ùdi unyukuka musangu wónsò wùndì ngeela meeji pa bwalu abu. Ànu ndambu wa tusunsa paanyimà pàà Mwanèètù Palmer mumanà kubànda pa bibàndilu, mèmè kupeta mukenji wa ne wàtùshìyì. Ncivwaku mwà kuciitabuuja to. Billy kumbiikilaye, ne muntu kampànda ùvwa mupeutàngàne... nènku bàvwa bamanye. Tuvwa balunda bàà banangàngàne be, ne pa kumanya ànu ne ùvwa mufwè, civwa ndinyukishiibwa dyà menemene. Kàdì butùdì naabu bwónsò mbwà kufwa, nànsha twètù biikale banganyì, tudi ne cyà kuya ku umwe ku umwe. Kàdì kùdì cintu ànu cimwèpelè: "Twǎnjì kuumvwayi dyoya dyà bwalu mu kaabujimà: Cìina Nzambi ne lama mèyì Èndè matùma, bwalu ebu ki bónsò bùdì naabù muntu," Mwambi 12.

<sup>15</sup> Mpindyewu, ncyèna ne dībà dipitepìte búngì bwà dileesòna dyà kàlaasà kàà Dyàlumingu edi to, kabidi dīyì ndimpàte.

<sup>16</sup> Amba tǔng, Mwanèètù Pearry Green's utù mwenze cintu cyà mushinga mukolè. Yèyè kungumvwa ngàmba, makèèlèlè dilòlò ne: "Ncyèna ne kafulu kàànyì kàà nsuki bwà kundama..." E kubikilaye kuntu kwàka bwà kupetaku muntu wa kukàntùmina

ku ndèka. Mémè kwamba ne: “Nwamanyì maja ngòmbà mumana kufwà, diyì dikaadi dimane kumpàta.” Ndi muteete kukaadi bidimu byàbûngì bwà kupetaku dijikija dyà bwalu ebu, kadi pangàakakapeta, ki kwòkù kumana bwalu. Kàdi ewu musangu ndi mukapwa mwoyi, ki kaayi diyì ndipate ndambu. Pa nànkù nwantwàlaayikù, bu nwènù mwà kuswa, mu dyakula.

<sup>17</sup> Mpindyewu, mbanganyì bàdì baswè kàlaasà kàà Dyàlumingù? Kaa, ekèlekèle, ncyà bushùwà. Ncintu címpè bwà kutumamu bàna bèènù balela. To, lekelaayi ndongololè, ncintu címpè cyà *kulwakù* ne bàna bèènù. Ncyà bushùwà, bwà kulwakù ne bàna bèènù; ne kulwa nwènù pèènù. Mbanganyì bàdì bamanyè mwàkabanga byà kàlaasà kèètù kàà Dyàlumingù? Nkwepi kwàkabangilaku? Mu Angleterre. Mmunyì mùvwàku kabìikidiibwa kumpàla? *Kalaasa kàà mu Commune*. Ncyà bushùwà, kabìikidiibwa ne: “Kàlaasà kàà mu Commune.” Ngaapu mwoyi mpindyewu dìnà dyà wàkakaàsa. Dìnà dyèndè ùvwa nganyì apa’s wè? [Muntu kampànda ùdi wàmba ne: “Robert Raikes.”—Muf.] Ncyà bushùwà, bushùwà menemene. Nènku ùvwa upatula twàna atu mu mùsèèsù, (tùvwa tukèngeledi, katùvwa ne mwaba wà kuya to, tùvwa mu mushìndu mubì be), wàkabàbweja ne kubanga kubàpa maleesòna pa Bible. Nènku nkakafike too ne ku bumwe bwà ku malondyanganyì àà matàmbe bunène à èkèleeziyà, pàmwè ne ònsò, leelù ewu, kàlaasà kàà Dyàlumingù. Mbímpè bwà kuya. Ikalaayi batwìishiibwe bwà kulwa, kulwa ne bàna bèènù balela. Ngeela meeji ne tabernacle ewu ùdi ne balongeshi, ne bibambalu bìdì ne byònsò, bilondeshile bidimu byà bàna, ne bikwàbò. Ne nwènù bacìdì bakudimwinakù mucima aba bacivwilakù kùdì Kilistò, tungunukààyì ne kulonda Mukenji ewu; lwàyi muneemu mu Life Tabernacle, nènku bòbò nebinwènzèlè bímpè.

<sup>18</sup> Mpindyewu, dilòlòlò edi netwìkalè ne mulongo wà babèèdì wà cyena kale. Netùsambidile ànu babèèdì mùshìndù utùvwa ne ciibidilu cyà kubàsambidila awu, Mwanèètù Jack ne Mwanèètù Brown.

<sup>19</sup> Ndi mvùluka ne mvwa mmòna Mwanèètù Brown ùteeta bwà kwabanya twarta twà disambila atu, ne muvwaye yèyè mwine bu mwambi, ne mu miine matùkù awu, mu bulongolodi kampànda bùvwà bufwànyine, bòbò, bàvwa bàmutwa cipooyi, nudi bamanye’s, “Mémè—mémè ndi mwanèènù mu cintu eci,” nudi bamanye’s, “bìdì bikèngela ùmfikìsha kuntwaku.” Kaa, ncyà bushùwà ne yèyè ùvwa mupicile mu cikondo cicolè be, kadi wàkashààla ne lulamatu ne mwèndè mwònsò. Mwanèètù Brown mmuntu wa maalu mímpè. Ne pa nànkù tudi bamunange.

<sup>20</sup> Nènku pàndì mmòna twètù bònsò, busàtù bwètù, twenda tuya, twenda bàkòname ne tukulakaja, batàngile ku ndekeelu. Neciikale cintu cyà dibungama menemene bu ne katùvwakù banji kuteeka munda mwètù cintu cinène aci, citùdì bamanye ne m’Bulelèlèlè aci to. Tudi munkacì mwà kudilongolola bwà

kwalukila òmwè dyà ku matùkù adi panshi àà, twalukila cyàkàbìdì ku bunsonga bwètù abu's, katùciyi kàbìdì... mibìdì yètù mishintùlùke, mivwijìbwe mu cimfwànyì Cyèndè bwà kwimanamu. “Bwalu pìikalà ntenta wa pa buloba udi cisòmbelu cyètù ewu mwà kuupudiibwa, kùkaadi mukwàbò mwindile.”

<sup>21</sup> Nènku citùpà cyàcì citùdì naacì ne kusàkidila, mulunda wanyì munanga, ncyà ne Mukalenge Yesù munanga... Nwènù bàdi nungeeyemene ne mèmè ndi nnwàmbila Bulelèlè; Mukalenge Yesù munanga, dindà kampànda lwà pa dîbà mwandamukulu, wàkandeja Buloba abu. Mpindyewu, kacivwa—kacivwa cikèenà-kumòna to, anyì, ncyèna muswè kwamba aci to. Nànsha ne cívwa cinyi, civwa cyà bushùwà ànu mündi ngàakula neenu kaaba aka emu. Mpindyewu, mèmè kumòna mpàlà yà bantu abu, kàdi ncivwa mwà kubajingulula to, bakaavwa baalukile cyàkàbìdì ku bwànà. Nènku bavwa ànu balelèlè menemene ànu mùdì... Mwva mwà kubàkwàta ku byanza ne bikwàbò. Ànu byà bushùwà... .

<sup>22</sup> Ki kunkwacishaci, bwalu mvwa ne ciibidilu cyà kwikala ne mmwenenu kampànda wa ne, pàvwà muntu ùfwa, ànu musùukà wèndè awu ke wùvwà wùya. Kadi pashìishe pàakacintèèlèlèYe, ne: “Pìikalà ntenta wa pa buloba utùdì basòmbelumu ewu yèyè mwikale... tukàadi ne mukwàbò.” Nwamònu anyi? Nènku bìdì bìkèngela bwà twètù kwikala ne bintu byònsò bisatu bisatu, bwà kukumbaja bupwàngàne. Nwamònu anyi? Nènku kùdì mubìdì ùmwèpelè mwaba ewu, pashìishe awu mubìdì mwàmwa ùdì mwikale mu—mubìdì wà mu dyulu, ne pashìishe mubìdì mutumbishìibwe mu dibìlkà dyà ku lufù. Nwamònu's, aci ncìdì cìcìvwija cyònsò cipate patapata. Nwamònu anyi? Pa nànkù cìdì... Ki mbwalu bukwatakaja to, kì ncìngenyìngenyi to, kì nnyuma kampànda to. Mmuntu mulùme ne muntu mukàjì ànu bu mùdì wèwè amu, ànu pyòpyopyò.

<sup>23</sup> Ne pashìishe, kùkaadi bidimu, mèmè kumòna myaba yà bajimine, ne mvwamu. Ndi nkwambila's, mulunda wanyì, bu muntu mukulakaji, lekèlaayi nnuswishishe cyòci eci, mu ditùnga dijimà mu dindà emu, kanùjingikù nànsha kakesè bwà kumòna mwine mwaba awu to. Kakwènakù mùshindù nànsha mukesè ùmwà mwà... bu mèmè mwikale muzòdì ùmwà mwà kuzòla cimfwànyì aci ne kàloosò to. Mèmè bu mwambi, ncyèna mufwànyine kunùmvwijaci to. Nwakula pèènù mùdì iferno mwikale mwaba ùdì wòsha, mmubì mutàmbe misangu muliyo mujimà kupita apu, bintu bìdì bikwacisha bôwa bìdimu.

<sup>24</sup> Kàdi Dyulu, anyì, mwaba ewu, ni pàvwà penyì, ncyèna mumanyè mwà kupàbìikila. Wàkawùtèèla bu mwaba wà “misùukà mwìnshì mwà cyoshelu.” Kàdi pààkenzekabi, ncyènakù kacyà... Kakwèna mùshindù wà kumvwijija bunène bùdiwu nànsha. Kùdì... Mpindyewu, bikengela nwènù kwangata ànu diyì dyànyì, ndi ànu muntu. Nwamònu anyi? Kadi bikèenà-kumòna ebi bitù misangu yònsò ànu byenzeka

mûndi munwâmbilebi amu, nudi bamanyè ne cyônsò cyà kùdibi citu cilelèlâ, *aci* ncilelèlâ kàbidi. Cyônsò cyûdì wenza, wêwè mupangile bintu byônsò (bukolè bwâ mubidi, dikàndâ, lumònu lwâ mèsù èbè, cyônsò cìdiku aci), kùpangidiku Aci to. Kakwèna cintu nànsha cìmwè cìdì mwâ kufwànyikijiibwa naaci to. Cìdì...Kakwènakù—kakwènakù mwaku nànsha ùmwè mu mwakulu wâ Anglais, wûndiku mêmè mumanye, ùdì mufwànyine kucyûmvwija nànsha. Bu wêwè mwâ kwamba ne “cipwàngàne,” s’ncipite ne apu’s; “kapelu,” nci—ncitambe aci; “mpàcì,”...Kakwenaku—kakwena myaku miine yîndi mêmè mumanye yìdì mifwànyine kubyâmba to, bwalu bìvwa...Ne pashìishe, bwâ kwela ànu meeji ne, aci kî nndekeelu waci nànsha. Mêmè kudyâmbidila ne: “Nciina mêmè bwâ kulwa apa nûnku anyi?”

25 Mêmè ne: “Nutu nudyâ anyi?”

26 Yèyè ne: “Apa to. Katwèna tudyâ apa to, kàdì patùdì twalukila pa buloba netùpeta mubidi utùdì tudìilamù.”

27 Èè, mvwa mwâ kubùùmvwa. Bàvwa ànu mùshindù *awu*. Nwamònu anyi? Ki bôbò...Mêmè ne: “Èè, nudi ne...” Kaa, èyowâ’s, bàdi ne mubidi kampànda. Ki ng’ànù bwalu bukwàtakaja to, mmubidi. Tudi bamanyàngàne muntu ne mukwèndè. Bônsò bavwa bammanyè, bàvwa bangeela kâpa, mìliyò ya bantu.

28 Ki mêmè ne: “Èè, ndi muswè kumòna Yèyè Udi mumfikishe mwab’ewu awu.”

29 Yèyè ne: “Kwèna mwâ kuMumòna mpindyewu to, bìdì bìkèngela windilè.”

30 Mêmè ne: “Udi muntèke apa bwâ cinyi...kuulu eku?”

31 Yèyè ne: “Wêwè uvwa mulombodi mu lwendu lwèbè lwâ pa buloba.”

32 Ki mêmè ne: “Udi uswa kwamba ne bônsò abu mbakwa-Branhams anyi?”

33 Yèyè ne: “To! Mbawàkakùdimwisha mucima kùdì Kilistò.” Nwamònu anyi?

34 Mêmè kukènzàkana, nènku pashìishe malòòlò wònsò àà lutatu awu, mateeciibwa, biye mwamwamwa, pâm vwa mwâ kutàngila mpalâ yàbò. Nsongàakàjì mukwàbò kulwaye lubilu mwaba awu, umwe wa ku bakàjì bàvwâ batàmbe kulengela kwìsù abu, ki kungeelayè ànu mabòko ku nshìngù, wàmba ne: “Mwanèètù wa Mushinga mukolè.” Nènku mmwenze ànu upicila apu...Mpindyewu, yèyè ùvwa mukàjì. Pa nànku...Kadi mwômò amu, kamwakwikalaku mpèkaatù to. Nwamònu’s, tujilu twètù tudi tushintuluke muntwamu. Kabàakulelamu kàbidi bàná, to. Nwamònu anyi? Nwamònu’s, bônsò mbàà mwomùmwe.

35 Cìdì cyenza dishìilangana, ndivwayila dyâ mubidi. Ki bwâ cinyi mêmè ncitu ngiitabuujà byâ dija dyâ maja mu cyalu

abi to. Muntu mulùme nànsha umwe...Mêmè, kumpàla kwà Nzambi ne Bible wanyi, ndi mwende nsòmbelu mukezuke, mvwa mùshindù awu mu nsòmbelu wanyi mujimà kacya pàncìvwà mwànà mutekète, mu bunsonga bwànyì bwònsò. Mwànà wa bakàjì yònsò ùngàakapàtùkàku nendè, ndi mwà kukùngamangana nendè buludi ku Cilumbulwidi. Nwamònu anyi? Kàdi kakwèna mulùme nànsha umwe, nànsha wèwè mwikale nganyì, udi mwà kulekela mukàjì (ne mubidi wèndè wa bwànà bukàjì awu) ukuupukila mukulamate; wèwè mwikale muntu mulùme mulelèlè ne mubidi mu wòwò, kùdi disaluka kampànda. Kàdi kacìvwamù to; kakwèna tujilu to. Nudi bwònsò ne tujilu tumwètumwè atu. Nwamònu anyi? Ànu dinanga dyà bânà bèètù bàà bakàjì ne dyà bânà bèètù bàà balùme, dikezuke, kadiyì disopakaja to, kutàmba mùdidi mwà kwikala bwà webè...anyi webè...kuupukila mwànèèbè wa bakàjì mutekète. Nwamònu anyi? Mwanèèbè wa bakàjì sungasunga, nànsha nànkù yèyè mmwenjiibwe...mmukàjì ne wèwè udi muntu mulùme. Nwamònu's, ncìfwànyìne kufùka cintu kampànda; kadi Mwàmwa kaciyèna mwà kwenzeka to, mpèkaatù bwèndè mbutùke, kwònsò nkumanè kujika. Nwamònu anyi? Cyà bushùwà...ànù Dinanga dyà dilelèlè, dyà cijila.

36 Ki mêmè kutàngila mukàjì awu. Bàvwa...bàmweka batwè ku miliyo yà bantu kuntwaku, ne bwònsò bàvwa ne nsuki mile, ne bilàmba bitòòke bitwe too ne ku makàsà. Nènku—nènku Yèyè mwine uvwa wakula naanyì awu, kwambaye ne: “Kwèna umujingulula anyi?”

37 Mêmè kwamba ne: “To.”

38 Yèyè kwamba ne: “Ùkaavwa mu bidimu byèndè makumi citèemà pawàkamulombolà kùdi Kilistò.”

39 “Ngàsà udi ukèmesha, dîyì dipòle kaayi's wè.” Nwamònu anyi? Kakwèna ànu mùshindù wà kuumvwija cìdi bwalu to. Angata wèwè ànu dîyì dyànyì cyanàànà pawikala ungiitabuuja. Ikala mutwishiiibwe bwà kwenza...wòsha cilamba cyònsò cyà pa buloba cìdi paanyimà pèèbè.

40 Mêmè ndi ngiitabuuja ne Èkèleeziyà ùdi ùbanga kutèeleja Mukenji, ne ùbanga kuumvwa. Kàdi, balunda bàànyì, tèelejààyì, bìdi bikèngela twètù kushààla baadija mu Bwikadi bwà Mwànà, bìdi bikèngela bwà twètù kubobeshiibwa. Diitabuuja dyètù—dyètù kadyèna dibobè to. Mu mùshindù wà mamanya à mu mutù tudi tuumvwa Mukenji ùdi Nzambi mutùpe, ne munkaci mwà kumòna bimanyinu bìdiYe mutulèèje, ne munkaci mwà kubishindikila ku Bible, bidikù, kàdi, kaa, mùshindù mwine ùdi Èkèleeziyà ukengela bwà kushààla mu Bwikadi Bwèndè's bwà kubwengetekaye, nudi bamanye's, ne kulwaye mupòlòbèle mu Nyumà bwà wàmòna mwà kutùkinamù. Misangu mikwàbò mu dyamba dyà Mukenji, udi uumisha maalù ncyoncyoncyo, bikèngela tubitwale mùshindù awu, bwalu bìdi bikèngela

kupoopela musonso bikolè kuwùbunya bwà kukwàtawù. Kàdi pàdi ànu Èkèleeziyà ùCipeta, Basungula mbabiikidiibwe pambelu ne batapuluke, dībà adi bàdi mu Bwikadi bwà Nzambi, Ndi mumanye ne neciikale cintu kampànda bu bantu bàvwa Mwàmwa abu pènzekà Dyambwibwa Dyèndè.

<sup>41</sup> Mvwa muswe kwakula mu dindà emu pa *Dyambwibwa*, kàdi ncyèna ànu ne dīyī dikumbane bwà kucyènza to, ne pa nàнку nùntwàlaayikù katancì kakesè, pàndi muswe kwakula pa cyena-bwalu cyà *Mwaba Òmwèpelè Wà Dikuukwila Òdì Nzambi Mufile* apa.

<sup>42</sup> Mpindyewu, ncyena-bwalu cinène cyà menemene. Pa nàнку tusambilàayaaku mpindyewu. Ne mu ditùnga dijimà mu dindà emu, mwaba wònsò unùdì awu, inyikaayi mitù yènu bwà katancì kakesè cyanààna. Ikalaayi ne meeji matòoke a menemene mpindyewu, tukaadi tuseemena pabwipi ne Dīyī dyà Nzambi, didi diikale Nzambi mu mmwènekèlu wa maleeta.

<sup>43</sup> Mwena Mukàndà munène ewu, “N’Dimiinu,” mutwàkayila, “dyàkamyaminà mummyaminyi,” ki mùdì Mwenawù mwàmbe. Mpindyewu, tudi bajandule ne dimiinu nedikole piikaladi mu buloba bwa mùshindù mujaalàme. Pa nàнку, Taatù, Udiku mwa kutuula mu dindà emu mingonga yònsò ne nyinyaacisòngà ayi, ne bupidyà, ne meeji à mpatà mu myoyi yètù; bwa Dīyī dyà Nzambi dyàmòna mwà kudyunda didilekèlèla, dimyamina màyi kùdì Nyumà mu myoyi yètù, bwà twamòna mwà kuvwijiibwa cisàmbà cyà Nzambi. Enzaku nàнку, Taatù. Ki myoyi yètù nyòyi ayi. Kabiyi ànu bwètù twètù nkààyetù bàdi bajingulule cyòci eci to, kàdi kwikaleku bakwàbò mu ditùnga dijimà emu, mwoyi wà muntu yònsò ùdì ulakuka ne dinanga ne kalolo, uteetèku bwà kuya kapeta mwanèètù wa balùme mujimìne, mwanèètù wa bakàji mujimìne. Enzaku nàнку leelù ewu, Nzambi. Tudi baKutekemene ne mwoyi mujimà, bwalu Wèwè udi Mulombodi wetù ne Mukalenge wetù. Pa nàнку tudi tulòmba bwà Wèwè kutùludika mu Dīyī Dyèbè leelù ewu, ne kutùpèèsha mabeneshà Èbè. Ku ngàsà Wèbè ne mu Dīnà Dyèbè mmutudi tulòmba nùнку. Amen.

<sup>44</sup> Mpindyewu, twangatàayi bwà cyena-bwalu cyètù... Ndi muswè kubala mu Mukàndà wa Dutèlònòma, Dipungila Dikulukulu, ànu bwà nshindàmeenu wa Mifundu. Ndi ne tuntu ndambu tùndì mufunde ne lukasa lwònsò paanyimà pàà mèmè mumane kufùma ku didyà dyà dindà ne Mwanèètù Vayle.

<sup>45</sup> Ncitungu mupete mpunga wa kwela muntu wa ku cilaala-beenyi awu twasàkidila... ku nzùbu wa cidiilu awu dilòlò adi to, wakatufucila bwà—bwà cyàkudyà cyètù cyà dilòlò adi awu. Mukàjàànyi ne mèmè ne mwanàànyi wa bakàji mukesè tuvwa kuntwaku, nènku pangayi bwà kufuta ticket wanyì wa byàkudyà, muntu kampànda ukaavwa mumane kumufuta. Nànsha ní ùvwa nganyì, ndi nkwele twasàkidila. Bàmbi ne:



“Mmuntu uvwa musòmbe lwà kundekeelu kwà cibàsa awu.” Mu bushùwà bwà bwalu kuvwa musumbà mujimà muntwamu utùvwà bamanye. Mpindyewu, ndi...cintu kampànda cyenzè bu Kickapoo, cintu kampànda cyà mùshindù awu, mwaba kampànda kuntu kwàka, ku cidìilu kutùvwà tusanganyiibwa. Twasàkidila, nànsha wêwè mwikale nganyi uvwa mwênze cintu aci awu. Yònsò wa kunùdi, Nzambi ànùbèneshè.

<sup>46</sup> Mpindyewu, mu nshapita wa 16 wa Dutèlènòma, eci mmukenji wà paasàkà. Pa nàнку tуди baswè kubala pa bìdi bìtangila ndambu wa mvensa ya ntwadijilu, mvensa yà kumpàla yinaayi anyi yitaanu, yisambòmbò kaaba aka.

*Ùlamè ngondo wa Abibà, ne ùlamè paasàkà... (Mbwenà kwamba ne “Ngondo mwinâyì.”)... MUKALENGE Nzambi webè: bwalu mu ngondo wa Abibà ewu MUKALENGE Nzambi webè wàkakupàtùla mu Ejiipitu bufuku.*

*Ki bwà cinyi wêwè neùlambulè paasàkà kùdi MUKALENGE Nzambi webè, wa nyama mikese ne nyama minène mu mwaba wàsungulà MUKALENGE bwà kutèèkamù dìnà dyèndè... .*

*Wêwè Neudye dyâmpà dìdi kadiyi dyela lwevenyi mu dyòdi to; munda mwà matùkù mwandamutekète neùdye dyâmpa—dyâmpa dìdi kadiyi dyela lwevenyi munda mwàdi...wêwè wapakàtùka mu buloba bwà Ejiipitu mu dilwijakaja: ...bwà wìkala mwà kuvùluka ditùkù dyùdi—dyùdi mupatuke mu buloba bwà Ejiipitu matùkù èbè ònsò à mwoyi.*

*Nènku kakwakwikalaku... dyâmpa dìdi kadiyi dyela lwevenyi dimweka ku luseke lwèbè munda mwà matùkù mwandamutekète to; nànsha kakwàkwikala cintu kampanda cyà musunya, cyùdi mulàmbule ditùkù dyà kumpàla ku dilòòlò, cishààle bufukù bujimà too ne mu dindà nànsha.*

*Kwèna mwà kulambwila paasàkà mu cìmwè cyà ku bìibi, bìdi MUKALENGE Nzambi webè ùkupeesha to:*

*Kàdi mu mwaba wùdi MUKALENGE Nzambi webè musungule bwà kutèèkamù dìnà dyèndè, mwòmò amu ke muwàlambwila paasàkà ku dilòòlò, ku dibwela dyà dibà, mu muvù uwàkapàtukà mu Ejiipitu.*

Mpindyewu Mukalenge àsàkidileku mabènesha Èndè ku dibala dyà Dìyi Dyèndè.

<sup>47</sup> Mpindyewu, bikolokolo bìdi ne mutooyi munda mwàbì anyi? Dilòòlò dishààle mvwa mùmvwe ne bìvwa ne mutooyi. Nudi mwà kumvwa bìmpè, kwònsò aku anyi? Kanwèna mwà kumvwa to. [Mwanèètù Branham udi ujalamiya cìkolokolo—Muf.] Mbìmpè nàнку anyi? Mbìmpè menemene, bwà kwakula ne bikolokolo

bipwekesha mûshindù ewu anyi? Mémè ndi ànu ne dîyî dimpàte ndambu, pa nànkù ndi mwimane pabwípì mu dindà emu bwà kabingila aku, ne ndi ntekemena ne Mwanèètù Pearry ùdi mwà—mwà kubìpatula kuntwaku. Nudiku mwà kucyumvwa bîmpè mpindyewu anyi? Ngeela meeji ne bakaadi bacilongolola. Èyo.

<sup>48</sup> Mpindyewu, kùdi ba-...Cintu cîndi njinga kwamba mu dindà emu ncyà ne Nzambi ùdi ne mwaba ùmwèpelè wùdi mukuukwidi mwà kutwilangana ne Nzambi, mwaba ànu ùmwèpelè. Munda mwà bikondo byònsò bààbûngì mbakèbe kaaba kasokome kàà Nzambi aka, munda mwà bikondo byònsò. Nànsha Yobò ùvwa muswè kumanya mwaba uvwaYe musòmbèle ne: “Ngìkalakù ànu mwà kuya kumbelu Kwèndè ne kukookola ku ciibi Cyèndè.” Yobo ùvwa muswè kupeta mwaba wa cisòmbelu cyà Nzambi, bwalu mwómò amu ke mùdi Nzambi ne famiye Wendè bakuukwila pàmwè.

<sup>49</sup> Bu makèèlèlè awu, mu diyiisha dyà makèèlèlè mu dindà, tudi tusangana ne kùdi mûshindù wà muntu kukuukwila Nzambi mu cijèngù, ne dikuukwila dyà meeji matòòke. Nzambi ùtu ne bintu byònsò ebi bimana kutulongolwela, kàdi bwalu budi ne, bìdi bikèngela bwà twètù kukenketa bwà kupeta mwaba udibi bisanganyibwa. Pòlò wàkambila Timòtè bwà kukenketa, ne bwà—bwà kwikala mu movu ne pambelu pàà movu, mudilongolole bwà kufila di—di—dîyî kampànda anyi. . . dyà ditekemena òvwa munda mwèndè adi.

<sup>50</sup> Mpindyewu, bintu byònsò ebi bìdi munda amu. Nènku tudi tusangana. . . Misangu mikwàbò ndi njinga kulwa ku Shreveport ànu bwà mbingu bu yibidi anyi yisàtu cyanààna ànu bwà kwangata tusunsa makumi asatu ku dilòòlò ne dilòòlò ànu pa dilongesha kampànda, nwamònu's, kushààla ànu mu Dîyî, mu mifundù misokome eyi, nwamònu's, mutùdi bafwànyine kujandula ànu menemene mûshindù wà kubwelamu. Nènku tàngilà ànu cyanààna, wenda ulonda njila wa Nzambi, kudi nsapì ànu yimwèpelè bwà ciibi cyònsò. Ncyà bushùwà. Nènku kakwèna nsapì, nànsha yòyì yimweka mifwànàngane naayi bishi, Nzambi kàtu ne nsapì yìdi yikangula bikuvu byònsò nànsha; ùdi yèyè ne nsapì yimwè. Nènku mpindyewu, bikèngela wikale ne nsapì ayi, cyanààna ciibi kacyàkunuzuluka to. Nànsha wèwè mwikale ne meeji matòòke a bishi, kwèna ànu mwà kukàngula ciibi aci to.

<sup>51</sup> Mpindyewu, mbanganyì bàvwà ku didyà dyà dindà dyà makèèlèlè, dindà adi? Èyo, ngeela meeji ne pàmwè ne bwònsò, nwènù bakese mmakumi citèemà pa lukàmà bàà kunùdi, anyi bapite apu. Bwà kushindamija cyòcì eci, cîngiikalà mwà kwamba eci, Davidi ùvwa mfùmù mwela maanyì (mwela maanyì kùdi Nzambi), mfùmù mutàmbe bunène ukaadiku Izàlèèlè mupetè, pa kuumusha Mukalenge Yesù (udi mwikale Nzambi) Mulaaba maanyì Awu. Davidi m'mwân'Èndè, anyi, Yesù ùvwa Mwànà wa Davidi bilondeshile mudibù, mubidi. Nènku bìdi

bikèngela bwà Yèyè kusòmba pa nkwaswa wa butùmbi wa Davidi bu mupyànyi, ànu mùtù—mùtù mwànà wa mfùmù misangu yònsò ùpyana nkwa—nkwaswa wa butùmbi wa mfùmù amu.

<sup>52</sup> Mònaayi, mpindyewu, ne Davidi awu ùvwa mulabiibwe, nànsha mwine muvwaye ne dilaabiibwa adi, wàkapàtuka mu diswa dyà Mukalenge ne dilaabiibwa adi; ne bantu bònsò, kabàyi bàngata diya dyà Mifundù anyi nsapì yà dibuulula edi to, bwònsò bwàbò balaabiibwe pààbò, bòbò bònsò, cyàpàmwè, beela mbila ne batumbisha Nzambi bwà cintu kampànda cìvwà ne mmwènèkelu mujaalame menemene: bwà kwaluja Diyì dyà Nzambi ku nzùbu wa Nzambi. Kàdi Davidi ùvwa mfùmù, kàvwa mupròfetà to. Nwamònu anyi? Yèyè... Kùvwa mupròfetà mu ditungà amu bwà kucyenzelaku, nènku Nzambi wàkapwekesha mudimu wònsò awu milongo mu kaabujimà bwalu kabàvwa bakwàte mudimu ne nsapì mijaalame nànsha. Ciibi kacyàkakanguka to. Nènku mpindyewu tudi ne cyà kuvùluka aci, ne kulama cyòci aci mu meeji. Kudi... Bwà bintu byònsò byà Nzambi, mùshindù kampànda ùdibi ne cyà kwenjiibwa, nènku aci's ke cidi cikosa bwalu. Mpindyewu, mwaba awu Nzambi ùdi ne Èkèleeziyà kampànda udiYe utwilanganamu ne bantu, ne Yèyè neàkwakidilè mu Èkèleeziyà awu ne kakùyì mu èkèleeziyà mukwàbò to.

<sup>53</sup> Ngàmbi cyòci eci bwalu batu bangumvùmvwe bibi misangu yàbùngì, ne bantu mbàngambile ne... .

Ndi ngàmba ne: “Udi mwena Kilistò anyi?”

“Mèmè ndi Baptiste.”

“Udi mwena Kilistò anyi?”

“Mèmè ndi Méthodiste.”

“Udi mwena Kilistò anyi?”

“Mèmè ndi mwena Mpenta.”

<sup>54</sup> Mpindyewu, nwamònu's, aci kacyèna cyùmvwija cintu nànsha cìmwè kùdi Nzambi to. Wèwè udi wenda utata ànu ne nsapì yà cyaanà. Kadi kùdi nsapì mijaalame, kùdi wùmwèpelè wùdi Nzambi... Kacya Nzambi kàtukù mulaye bwà kutwilanganaye neebè bu Méthodiste, anyi bu Baptiste, anyi mwena Mpenta, anyi ní ndingumba dikwàbò kaayi to. Yèyè kèna nànsha utwa mangumba mushinga to, àdi abengangana Nèndè.

<sup>55</sup> Pa Diyishi dyà dileepa adi, nènDiyishe ku tabernacle àbìdì àdì panshi aa. Nènku díbà adi Mwanèètù Jack neàCitéèleje, ne pashiishe nudi mwà kumòna cinùdi baswè kwenza pa Bwalu abu, bwalu neCìkwaciibwe pa mikàbà yà mèyì.

<sup>56</sup> Mpindyewu, bantu batu benza maalu bu ne Nzambi mmwenzejiibwe ànu bwà katwilangana naabò pa bishimikidi byà teolòji wabò awu. Mpindyewu, bantu batu benza maalu mùshindù awu. Ki mbaswè kuswikakanaku nànsha umwe ne mukwàbò to. Bu-Trinitaire bwà beena Mpenta ki mbaswè

kuswikakana ne ba-Unitaires, anyi ba-Unitaires ki mbaswè kuswikakana ne ba-Trinitaires to. Ba-Méthodistes ki mbaswè kuswikakana ne ba-Baptistes to, bwalu ewu yêyè udi mwena ne ànu mikenji ne mukwàbò n'Calviniste, pa nànkù kabātu ne bwobùmwe nànsha bukesè to. Nènku bàdi bàkondakajangana meeji à bantu mu mùshindù wà ne bàdi bafika too ne kudibengangana ewu ne mukwèndè.

57 Mvwa muyè bwa kasambila, kukaadi cikondo, mu cibambalu kampànda cyà lupitaadi. Kuvwa inābānzà kampànda mulaale panshi apu ūsaama be, ūvwa ne cyà kupicila ku keele, bāvwa batekemena bwà kufwāye. Inābānzà mukwàbò mulaadika mwaba awu (mvwa mubīikidīibwe bwà kumusambidila.), mēmè kumwambila ne: “Bidiku mwà kukutacisha bu mēmè mwà kusambilakū katancī kakesè cyanānānā anyi?”

58 Ke yêyè ne: “Pwekesha cilāmbà cikudika aci!”

59 Ki mēmè ne: “Umfwileku luse.” Mēmè ne: “Mvwa ànu muswè kwenza disambila.”

60 Yêyè ne: “Pwekesha cilāmbà cikudika aci!”

61 Mēmè ne: “Èyowà's, mandamu.” Yêyè ne mwanèndè wa balūme basōmbe mwaba awu, ka-*Ricky* kakesè kaa ciibidilu. Ki mēmè ne: “Èè, kwēna mwena Kilistò anyi?”

62 Yêyè ne: “Tudi ba-Méthodistes!”

63 Mēmè kwamba ne: “Èè, ncyēnaku mukukonka aci to, ndi nkukonka ní uvwa mwena ‘Kilistò.’” Nwamōnu anyi?

64 Ki yêyè ne: “Pwekesha cilāmbà cikudika aci!”

65 Nwamōnu's, bwalu muntu kampànda uvwa kayi Méthodiste to ūvwa ne cyà kwenza disambila bwà mukāji uvwa upunga ne lufū, yêyè mwikale pèndè ūpunga naalu. Kādi bu muvwaci ne kacivwa ciswikākāne ne bulongolodi bwèndè yêyè mwine to, kavwa nànsha muswè kucyūmvwa anyi kwikala naaci bwalu to. Piikala awu kayi Mufaalèsà to, ncitukū mwanji kumōna nànsha umwe to!

66 Indilaayi too pānūmvwà *Kajila Kàà Nyoka*. Huh. Èyo. Mpindyewu, bàdi beela meeji mpindyewu ne dīgumba dyàbò ki dīmwepelè dīdī Nzambi mumanyè ku mikāndā: “Nzambi kàākukuumvwa paūdi kuyi Méthodiste, anyi Baptiste, anyi—anyī Trinitaire, anyī Unitaire to,” anyī cintu kampànda cyà mùshindù awu. Aci ncyà mafi!

67 Nènku ki kàānyī kiipacila nkōkò aku; kādi kwōkò kwikāle di—dijinga dyà nānkù awu mu meeji a bantu ne myoyi bwà kwikala bajaalame...Ncyēna ngiitabuuja ne mukāji awu mmucyēnzè bwalu...anyī muntu mukwàbò kanà yōnsò ewu. Méthodiste kāvvakū mufwānyine kujuuka bwà kutwà èkēleeziyā wa ba-Méthodistes nyama ku mikōlò bwalu yêyè—yêyè mumanyè ne mmubī to. Muntu awu ūdi wela meeji ne mmwimpè. Mēmè ncyēna ngiitabuuja ne Trinitaire

mmufwànyine kupiisha Unitaire, anyi Unitaire, ùpiisha Trinitaire, mu Mpenta, bwalu mmuswè kwikala mushiilàngane to, ùdi wèla meeki ne mmubîngè, ne udi ne cyà kuneemeka yèndè mmwèneni. Udi mumanyè's, biyaaya mwà mande ne mwà nshimbà. Kadi, vùlukàayi ne, mu byònsò abi, kwòkò kwikàle cintu kampànda mu mwoyi wà mulùme anyi mu mwoyi wà mukàji cìvwabo biitabuuje ne cyòci aci "ncilelèlè," dîbà adi kùdi ne cyà kwikala mwaba kampànda ùdi mulelèlè. Ànu mûnkaadiku mwambambe ne: "Pàdi ndondo ùbiikila ndondo, bikèngela kwikalè ndondo kampànda bwà kwandamuna ku dibiikila adi."

<sup>68</sup> Nudi bamanye's, mbatwàmbile ne—ne nyama wa phoque musangu kampànda ùvwa wèndakana ku mwelelu wà mâyi a—a mbû, ne mikòlò. Kadi mpindyewu kèna ne mikòlò to, mmikudimuke bipèpà bwalu ùvwa mwà . . . ùvwa ne dijinga dyà bipèpà pakuumukaye naatu ku bulaba bùme, nyama wa myòsa, bwà kuya ku mbû; bufûki bwàkamwenzela bipèpà pamutù pà mikòlò, bwalu ùvwa mwà kutàmba kowela kupita muvwaye wènda ne mikòlò.

<sup>69</sup> Ncyèna mwà kuvùluka muntu munène ewu mpindyewu wàkaya ku Pòle Sud awu to. Dyèndè uvwa nganyì's? Byrd. Bàdi bàmba ne ùvwa ne nkooci mitelela ngombe kampànda, mu lwendu elu; ne ùvwa mwangate ngombe bwà kupeta mabèèlè. E kwenzayè nkooci yà myòsà bwà kulama ngombe bwà kayikwaciki mashika yàfwà to. Kadi pààkafikayè kuntwaku, kabyàkakèngela nkooci yà myòsà nànsha, bufûki bwàkayitolweshila nkooci wa myòsà. Nwamònu anyi? Bwà cinyi? Kumpàla kwà kwikalaku musààlàla pa mongo wà mushipa, kuvwa ne cyàkwikala mâyi à kowelamu cyanàànà kawuwwa ne cyàkwikala ne musààlàla to. Mwaba awu . . . Kumpàla kwà kwikalaku mucì kampànda bwà kukolawu *mu* buloba, bivwa bikèngela kwikalaku buloba kampànda bwà wòwò kukolelamù, cyanàànà kakuvwa ne cyàkwikala mucì nànsha.

<sup>70</sup> Pa nànkù, nudi numòna's, bu mudiku ànu cintu kampànda munda mwà mwoyi wa muntu ciikale cibìikila cintu kampànda, kudi ne cyàkwikala cintu kampànda pambelu apu bwà kwandamuna, bwà kusànkisha dibiikila adi.

<sup>71</sup> Mukàji kampànda . . . Kùvwa dipanda dyà citàlù dyenzèke muneemu kukaadi matùkù mapite paanyimà apa cyà mukàji kampànda uvwa mufwè. Kadi kabingila, kadibo—kadibo bàmba, kadi kamushipe, nkà ne ùvwa ùdya matùngulù ku musangu ne ku musangu, dîbà dyònsò. Bu yèyè kayi ùdya matùngulù to, mutù wèndè ùvwa kwikala ùmusaama, ne bintu byònsò; kabàvwa mwà kucijandula to. Pa nànkù pàjikijibu dipanda dyà citàlù aci, e kusanganabò cyûja munda mwà mukàji awu cyà mùshindù kampànda wà tubulu twà mashi; bàvwa bacipeesha dî—dîna kampànda. Kadi bàvwa mwà kwangata cyûja aci ne kucitèeka mu cibàkudì cyà matùngulù, civwa cyèngulula

matungulù awu munda mwà butùkù bujima abu. Nwamònu anyi? Cìvwa ncinyi aci? Cìvwa ncintu kampànda munda mwà mukàji cikeba matungulù, ne bu kwòkò kakuyi matungulù to kakùvwa mwà kwikala cyùja nànsha cìmwè to.

<sup>72</sup> Mu ngaakwilù mukwàbò, bìkèngela kwànji kwikala dyàmbedi Mufùki, kumpàla kwà kwikalaku bufùki. Nwamònu anyi?

<sup>73</sup> Mpindyewu, pìikalabi ne munda mwà mwoyi wà muntu mudi dijinga kampànda... Bu mudi ba-Méthodistes, ba-Baptistes, ba-Presbytériens, beena Kàtòlikè, bakwàbò bónsò aba, bàdi bateeta bwà kupeta njila ùmwèpelè mulelèlà awu abu, ne mbambila kùdi mwakwidi wabò ne bampaasàtà bààbò, ne bikwabo, ne: “Ewu ke njila mulelèlà.” Bàdi bàmba ne, mwakwidi ùdi wàmba ne: “Kakùtu lupàndu pambelu pàà èkèleeziyà wa Kàtòlikè to.”

<sup>74</sup> Èè, èkèleeziyà ne èkèleeziyà udi wangata wendè... mmwènenu wendè yèyè mwine. Bàmwè bàà kudibo kabààkucitaba to, kàdi bàdi bacyenza ku cyenzedi cyàbò. Cyenzedi cyèbè cìdi cyàkula ne dîyi dikolè kupita dîyi dyèbè. Cìdi ànu... Mu mùshindù mukwàbò, bàdi ànu beena lubombo bèètù aba kutàmba beena Kàtòlikè. Beena Kàtòlikè bàdi bàcìjikula patòòke ne: “Mémè ndi ngiitabuuja ne eci ki cintu cìmwèpelè,” kàdi bóbò ki mbaswè kujikula nànkù to. Bàdi bàcìsokoka, kàdi byenzedi byàbò bìdi bìjaadika cìdìbo beela meeji aci. Nwamònu anyi?

<sup>75</sup> Mpindyewu, bìdi bìkèngela bwà kwikalaku mwaba ùmwèpelè, bwalu kùdi dijinga munda mwà mwoyi wa muntu bwà kuwùpeta. Ne ndi ngeela meeji ne Dîyi dyà Nzambi ke didi ne dyandamuna bwà byònsò bitùdi naabi dijinga. Pa nànkù Nzambi ngudi ne dyandamuna, nènku tucikenketaayi mpindyewu mu Mifùndù. Nènku dîbà adi bu Nzambi mwà kutuleeja ku Mifùndù mwaba ùmwèpelè awu, cishimikidi cìmwèpelè (dingumba òmwèpelè, pìikalabi ne bìdi nànkù), njila ùmwèpelè wìkalà Nzambi mwà kusangila ne muntu, dîbà adi bìvwa bìkèngela twètù kwikala bakwàte ku aci bwalu tudi bapete Bulelèlà bwà Bible, cidiBu bwàmba aci.

<sup>76</sup> Mpindyewu, mwàku *Dutèlònòma*, mwàku wòwò mwine ùdi wùmvwiya ne “mikenji yìbìdì,” mwàku *Dutèlònòma*. Ne Nzambi ùdi ne mikenji yìbìdì. Mikenji yìbìdì ayi: ùmwè wà kudiyi ùdi mbupidyà ku Dîyi, ne kufwà; ne mukwàbò nditumikila Dîyi, ne kwikala ne mwoyi. Ki mikenji yìbìdì nyòyi ayi, ne Dutèlònòma mbwena kwamba ne mikenji yìbìdì ayi. Bubidi bwàyi yivwa milejìbwe patòòke kutùdi kakuyi mpatà to munda mwà Mifùndù. Ùmwè wà ku yòyi ndufù, mukwàbò ùdi Mwoyi; Mwoyi ne lufù. Nzambi ùtu ùkwata mudimu ànu ne Mwoyi, Sàtaanà ànu mu lufù. Ne byòbì ebi mbileejìbwe patòòke kùdi bantu bitwilangane, bitòòke tòò kumpàla kwà dísù

dyònsò, ne kakwenaku cyà kudingila nànsha cikesè bwètù twètù to. Ûmwè wà kùdiyi wàkaleejibwa patòòke pa Mukuna wà Sinààyi pààkafidiibwa mikenji, yàkapiisha bukwàbantu bwònsò nkòòng ku lufù; mukwàbò wówò wàkafidiibwa pa Mukuna wà Kàlvariyo, ki wàkatwàla bukwàbantu bwònsò nkòòng ku Mwoyi, pààkafuciibwa cibawu mu Yesù Kilistò. Mikenji yibidì yà mu Dutèlònòma yivwa myùle mu bintu binène, bibidì ebi.

<sup>77</sup> Ndi muswe bwà nwènù kumòna cyàkàbidì ne, kuvwa kàbidì bipungidi bibidì bìvwa bifidiibwe. Cipungidi cìmwè cìvwa cifiidiibwe kùdì Adama, cìvwa cishindàmene pa mishìngà, bu mikenji: “*Wèwè* kuyi mulenga eci to, dìbà adi newikale ne mwoyi; kadi *wèwè* ànu mudidinge mulenge eci, neufwe.” Aci’s cìvwa mmukenji. Pashìshe kùvwa mukenji mukwàbò mufidiibwè kùdì Abraham, ùvwa nku ngàsà, kawùyi ne mushìngà mwenza to: “Ndi mukusungile ne dimiinu dyèbè paanyimà pèèbè.” Amen! Aci ncifwànyikijilu cyà Kàlvariyo, kaciyi cìfwanyikijilu cyà cipungidi cyà—cyà—cyà Adama to, ncìpungidi cyà Abraham.

<sup>78</sup> Kàdi mpindyewu tudi tuMuumvwa wàmba ne kùdì mwaba ànu wùmwèpelè wàtwìlanganàYe ne muntu bwà kukuukwila. Tudi tucibala ànu mwab’ewu mene mu cyena-bwalu eci. Netùcileedile, paanyimà, mu tusunsa tukese emu.

<sup>79</sup> Dìbà adi kwòkò kwikàle mwaba ànu wùmwèpelè wùdì Nzambi ùtwìlangana ne muntu, bìvwa bìkèngela bwà twètù kwikala badimukè bikolè. Mpindyewu tuteekàayi ku luseke bilèlè byètù mu dindà emu, ne . . . mu dileesòna edi dyà kàlaasà kàà Dyàlumingu, nènku ikalaayi batwìshìibwe menemene ne tudi tupeta kaaba kàmwèpelè aku. Bwalu, Nzambi mmwambe mwab’ewu ne, Yèyè kààkukwakidilaku mu mwaba mukwàbò nànsha ùmwè to. Èkèleeziyà mukwàbò kanà yònsò ewu, Yèyè kààkukwakidilamu to. Ànu mu Èkèleeziyà Wendè, ki mwaba wùmwèpelè wàkwakidilaYe awu.

<sup>80</sup> Mpindyewu: “Udi mufwànyine kwamba cinyi, Mwanètù Branham? Pìikalabi ne ndi ne meeji matòòke?” To.

<sup>81</sup> Vùlukàayi ne, Yesù wàkaakula ne bàmwè bantu bàà meeji matòòke, bakuukwidi bàà mu ditùkù Dyèndè, ki Yèyè kwamba ne: “Nudi nuNkuukwila mu cyanàànà.” Dikuukwila dilelèlè, dishùwashùwale dyumukila mu ndondo wa myoyi yàbò. “Nudi nuNkuukwila mu cyanàànà, nulongesha mèyi matùma à bantu bu dilongesha,” anyi twìtabàayi wabò wa cyena-màngumba awu. Ne meeji matòòke, ne kaneemu kònsò, ànu bu batèndeleeedi bàà dipòkò bàà menemene. Nènku aci kacìvwa cibangà ànu ne Bafaalèsà to. Kaayina ne Abèlè, bakuukwidi bàbìdì bàà kumpàla bààkalediibwa, dilediibwa dyà mu bufùkì emu pa buloba, kakùyi mpàtā to bàkalwa mu lwidì lùmwèlùmwè alu.

<sup>82</sup> Kaayina’s uvwa mutèndeleeedi ànu mùvwa Abèlè amu. Bònsò bàbìdì bààkiibaka byoshelu. Bònsò bàbìdì bàvwa banange Nzambi. Bònsò bàbìdì bààkafila milàmbù. Bònsò bàbìdì

bàwva bakuukwila. Bónsò bàbìdì bààkafuta byàdiikumi. Bónsò bàbìdì abu bààkènta bintu ànu bifwànàngane. Kàdì Abèlè, ku *diitabuuja* dìdì “dibuulula adi,” Dīyì dyà Nzambì dibuulula, dileejìibwe patòoke, padima pasengela, ne dishìndika. Butùmbi’s wè! Kaayina wakàfila mulàmbù, kàdì Nzambì kààkawùshindika to. Nzambì ùvwa mulòmbè dikuukwila, ne Kaayina ùvwa mufile mulàmbù, kàdì Nzambì kààkawùshindika to. Kàdì ku kajila kalelèlè . . .

<sup>83</sup> Wèwè udi wamba ne: “Èè, wanyi èkèleeziyà’s nyèyè. Wanyì . . .”

<sup>84</sup> Anji indilaayi kakesè. Nzambì ùdì ùmvwija Dīyì Dyèndè Yèyè mwine ku mèyì adiYe mwakwile awu. Nwamònu’s, Kaayina wàkamba ne: “Mémè ndi mutèndèleedi. Ndi munangi wa Mufùki wanyì. Ndi nKulàmbula cyoshelu cimpè eci. Ndi nKulàmbula mulàmbù ewu. Ndi mwibake bintu byònsò ebi, Mukalenge, bwalu ndi muKunange.” Abèlè wàkamba cintu cìmwècìmwè aci. Mpindyewu, ng’ewu udi mushindikiibwe, ewu udi mujaadikiibwe awu. Ki Nzambì kutuuluka ne kwakidila mulàmbù wà Abèlè, bwalu ku dibuulula yèyè wàkafika mu kajila kalelèlè kàà Nzambì kàvwà kiitabujìibwe aku.

<sup>85</sup> Mpindyewu tàngilààyì numòne ne nyumà wa Kaayina awu wàkapweka buludì mu Mifùndù, ànu nànkù too ne ku ditùkù dyà ndekeelu edi mene. Bwà ne mbiitabi bàà maalu mudiwu mafùndiibwe anyì? Mwikale mwitabi wà maalu mudiwu mafùndiibwe ànu mùvwà mukwàbò awu.

<sup>86</sup> Tàngilààyì mupròfetà Baalàmà ne mupròfetà Mòsà. Bónsò bàbìdì biikale ne byoshelu mwandamutekète, byoshelu byà Yèhowàh, mashi pa cìmwè ne cìmwè; ne kabiya ànu abi to, kàdì bimpàngà byà mìkòòkò biikale pamutù pàà cìmwè ne cìmwè. Mu dilonga dyà nomba, ànu menemene nomba mwìmpè, *mwandamutekète*, “mupwàngane,” bimpàngà byà mìkòòkò mwandamutekète. Bifwànàngane ànu pyòpyopyò, byoshelu byònsò bìbìdì abi’s. Mwikale witabuuja maalu ànu mùdiwu mafùndiibwe mùvwà umwe, ke mùvwà mukwàbò pèndè. Kàdì Nzambì ùvwa mushindike nganyi? Nwamònu anyi? Nwamònu anyi? Yèyè uvwa mu Dīyì Dyèndè awu. Kwitaba kwà maalu mudiwu mafùndiibwe kabwèna ne cìdìbu buumvwija nànsha; kàdì ndibuulula dyà Nzambì.

<sup>87</sup> Mpindyewu elànganaayi meeji! Bantu aba, bavwa bàbìkìdìibwe bwà cinyì ne bàtèèkìibwe mu ngiikadilu ewu (Bafaalèsà aba) kùdì Yesù, wamba ne: “Nudi nuNkuukwila mu cijèngù”? KuMukuukwila: dikuukwila dishùwashùwale, dikuukwila dilelèlè dyà dyuumukila munda mwà myoyi yàbò. “Nwènu . . . Nudi nuNkuukwila mu cijèngù.” Bwà cinyi? Bàdì balongesha dilongesha dyà nshìndàmeenu dyà bilèlè byàbò byà bantu. “Ki bwà cinyì nudi nuvwija mèyì matuma à Nzambì kaàciyi ne bwenzeji kùdì cisàmbà to.”



<sup>88</sup> Mêmè munulongeshe mukenji wà ba-Méthodistes, kawàkwikala ne bwenzeji pa nwènù nànsha, eci ncikondo cyà Mukàjì-musèlà. Bu ne Mòsà wàkalongesha mukenji wà Noa, kawùvwa mwà kwikala ne bwenzeji nànsha. Bu ne Yesù wàkalongesha mukenji wà Mòsà, kabìvwa mwà kwikala ne bwenzeji nànsha. Bwalu mamiinu madyanjila kulongolola adi asanganyibwamù yikala mwà kwediibwa mâyì à mùshindù awu àdì mafidiibwe bwà dimiinu adi awu. Nwamònu anyi? Kadyèna mwà kukola mu ngiikadilu mikwàbò to. Yidi ne cyà kwikala ngiikadilu yidì yidikolesha.

<sup>89</sup> Mpindyewu, wêwè udi mwà kwangata diyi dyà nzoolo kuditeeka mu cyamu cyà ditoyishila mayi, òvwa ne cyà kwikala mwinshi mwa nzoolo wa cikuka, kàdi neditooyikè nànsha bishi. Diteeka mwinshi mwà kabwà neditooyikè. Nduyà, ke ngiikadilu udi wenza ne ditooyikè. Pa nànkù bikèngela diikalè mu ngiikadilu kampànda. Udi mwà kwangata diyi òmpè diikale ne mwoyi kàdi kuditèeka mwinshi mwà nzoolo wa cikuka mufwè, kadyàkutooyikaku to. Nwamònu anyi? Nwamònu's, bwalu mbwà ngiikadilu.

<sup>90</sup> Èè, mùshindù awu ki ùdibi mu cikondo citùdì ne mwoyi eci, bidi bikèngela bwà nwènù kupeta mùshindù wà Nzambi wà dicyènza bwà cikondo eci. Ki cyàkapeta Martin Luther, ki cyàkasanganà John Wesley, ki cyàkasanganà beena Mpenta mu cikondo cyàbò ncyòci aci. Cikondo cyà Nzambi ne òbà dyà kucyènza.

<sup>91</sup> Mpindyewu, beena Mpenta. Mwanèètù wa balùme awu, òmwè... Ngeela meeji ne dyèndè... òmwè dyà ku mèsù èndè òvwa òfwè, mwanèètù kampànda wa bafìke wàkabanga menemene diyiiisha dyà Beena Mpenta mu Californie, mu Mùsèèsù wà kale wà Azuza awu's. Bàvwa bamuseka, bwalu ùvwa mufika. Bàvwa bamwelulwila, kàdi yèyè ngwakatwàla mukenji wà cikondo aci. Ànu kanyikanyi wa muncyoncyo, kalumyana kàvwa kakàyi kamanyè nànsha mwà kufùnda ònà dyàkò mene to, kadi Mukalenge ùvwa mukàbuulwile ne eci cìvwa ncikondo cyà dyalujulula dyà mapà awu, nènku wòwò e kulwawù. Nànsha bambè *cinyi*, wòwò àkalwa. Kadi muntu yònsò e kubwelayè mu cyuyüya cyà cyòci aci, ne kumònayè ne cìvwa ncikondo aci, ne kumònabò Nzambi ushindika ne bantu abu bàvwa mwà kwakula mu myakulu, ne bikwàbò, kwenzekabì. Kàdi pashìishe pàakayàye kupoopela musonso bikolè ne “eci ke cishindikì cimwèpelè,” ki cyòci kucìshipaci. Nwamònu anyi? Ki kutùngùnukabo ànu nànkù, nwamònu's. Ki cyàkacyènza nànkù. Ki kubangabo kutapulula *cikampànda*, *cikansanga*, ne kwenza màngumba; ne òmwè ne ùlwalwa pa òtùtù, ne òkwàbò ne ùlwalwa mu kaacipuka. Nènku kaa, ekèlekèle, ki cyòci ciyààya cyàcya.

<sup>92</sup> Ki cidi màngumba ènza ncyòci aci. Nwamònu anyi? Nzambi kì mmutwàdi wa òngumba to, bwalu òngumba m'Baabùlòona,

ne Yêyè kî mmufidi wa cibwejàkàjì to. Tudi tumumòna yònsò . . . Kabyena bikèngela nànsha bwà wêwè kwikala ne mamanya a mu mutù bwà kumòna aci to. M’Baabùlòona! Nwamònu anyi? Bilèlè (anji elàayi meeji pa bwalu abu), bantu bàà meeji matòòke. Mpindyewu, nànsha nànkù, bwalu badi biitabuuja aci, kùdikù ànu ne cyà kwikala mwaba kampànda wa meeji matòòke ùdì Nzambì utuutakeena.

<sup>93</sup> Mpindyewu mònaayi mvensa mwi2. “Kukuukwila mu mwaba wùndì *Mémè* musungule.” Mulàmbù, mu bushùwà bwà bwalu, mwaba ùvwàbò bakuukwila pa mulàmbù awu. “Mwaba wùndì *Mémè* musungùle; kî ngunùdì nwènù basungule to, ùdì muntu musungule awu to. Kàdì ùndì *Mémè* musungule, nwènù kukwilaayi mu mwaba ewu.” Mwaba awu bìdì bileeja ne kudi mwaba ànu ùmwèpelè, mikwàbò nyà cyanaàna. Kawèna ne cyà kwikala ku disungula *dyèbè* nànsha, kàdì cìdì ne cyà kwikala disungula Dyèndè Yêyè.

<sup>94</sup> “Èè, kabyèna bikèngela nye mu èkèleeziyà to.” Anyi ne: “Udi ne meeji mapàte! Mòna’s, wêwè’s newikale mene ànu ukokangana ne bakàjì pa diyiiisha, ne . . . anyi ne bakàjì pa dìbebula dyà nsukì yàbò, ne balùme pa bintu bikwàbò ebi. Mòna’s udi ne meeji mapàte!”

<sup>95</sup> Èyo, kwèna ne cyà kulonda njila wa Nzambì pa bwalu abu to, wêwè patuka pambelu uye kudibo bènza cyòci aci aku. Nwamònu anyi? Nènku neùjandule ne cìdì mu Mifùndù, pa nànkù: “Bàdì baNkuukwila mu cyanaàna.” Yesù wàkamba cintu cìmwècìmwè aci. Nwamònu anyi?

<sup>96</sup> Ne katoba kakesè kònsò, kantu ne kantu, udi ne cyà kwikala ne lulamatu mu kòkò. Bitu misangu yònsò ànu mvinyo mikesè—mikesè, tuumikènge tukèsè—tukèsè atu ke tùtù tunyangakaja tumuma twà mvinyo. Misangu mikwàbò udi uumuka . . . kî mbintu binène byùdì wenza to, ntuntu tukèsè tùdì ushiya katùyì twenza atu. Vùlukàayi ne, munyòlòlò ùtu ànu ne bukolè bwàwù menemene pa dinungu dyàwù dìdì ditàmbe kuteketa adi. “Baabèneshiibwe ng’aba bàdì benza mēyi matuma *wònsò* à Nzambì, bwà bààmònakù mwà kupeta bukenji bwà kubwela.” Enza *cyònsò* cìdì Nzambì mwambe.

<sup>97</sup> PiikalaYe mwambe bwà bakàjì kwikalabò ne nsukì mile, udi wamba ne . . . muntu mmungambile ànu àbìdì àdì panshi àà, wamba ne: “Mémè ncitu nyiisha ntèndeelèlu wa nshinga wà bilàmbà to.”

<sup>98</sup> Mémè ne: “Nànkù kwèna uyiisha Èvànjeeliyò to.” Èyowà.

<sup>99</sup> Nzambì mmùcyelà patòòke mwaba awu, mMwàmbà cyà dyenza. Nènku anyi udi ucyèenza . . . Ki cintu cyèbè cyà mu bufùkì ncyòci aci, cyà lungenyi ncyòci aci. Nkantu kakesè kaayi aku’s . . . ncinyi . . . kakesè kàdì kakàyi ne mushinga aku. Yesù wàkamba ne: “Babèneshiibwe ng’aba bàdì baswè kwangata tuntu tukèsè twònsò atu, kwenza tuntu tukèsè atu.” Kàdì mukàjì

bwà kulekelaye nsuki yèndè yileepa, aci cìdi ànu . . . mòna's, cìdi ànu cintu kampànda *cidiye* mwà kwenza, kàdi yèyè kèna nànsha muswè kwenza nànkú to. Kààkwenzaku nànsha aci to.

100 “Kaa, tulongèshè bintu binène.”

101 Mmuniyì mùdi mwà kulongesha bintu binène, pawùdi kuyi muswè kwenza cintu cipeepèlè, cyà mbangilu eci? Bwalu, udi umòna's, kabingila kèèbè ne kiipacila kèèbè mbibì.

102 Ndinanga dyèbè kùdi Nzambì ne: “Mukalenge, nànsha Wèwè muswè bwà mèmè kwenza cinyi, ndi muswè mèmè kucyènza.” Dìbà adi udi ufika mwaba kampànda, kàdi wèwè kuyi ucyènza mùshindù awu to, mùshindù ùdiYe mwambe bwà kucyènza awu . . .

103 Ndisungula Dyèndè ne: “Mwaba wùndi Mèmè musungule.” Ki mwaba ùdi ukuukwila ne mulàmbù wèbè ngwòwò awu.

104 Udi utèeka . . . Kaayina kutwàlayè mulàmbù wèndè, Abèlè kutwàlayè wèndè, mbilààle ku mwaba ùdi uya nawu. Wèwè muwùbweje mu mwaba wùdiYe musungùlè, nebìikale ànu bîmpè menemene, Yèyè neàwítàbè; kabìyi nànkú to, Yèyè kààkuwítàbakù to. Nànsha ciikàlè cinyi, cìdi ànu mulàmbù ùmwèùmwe awu, nànsha ciikàlè cinyi, ùcidi ànu mu- . . . mubèngùibwe, padiwu kawuyi mutwàdiibwe mu mwaba kampànda awu.

105 Mpindyewu tudi baswè kujandula ne mmwaba kaayi wutùdi baswè kutwàla mulàmbù ewu. Tudi bafwànyìne kujandula . . . Twètù bwònsò tudi baswè kuya mu Dyulu. Ki mmwòmò anyi? Ne twètù bònsò tudi bamanye ne tudi benze bibì. Tudi twitabuuja bwònsò ne Yesù ki Mulàmbù awu's. Mpindyewu tudi baswè kumanya mwaba wa kuMufila, wìkalawu—wìkalawu mwitabùùjìibwè. Nwamònu anyi? Ncyà bushùwà. Bible ùdi ùtwàmbila mwaba wa kuwùfila, nwamònu's, ne newitabiibwe; pa kumusha mwòmò amu, kawàkwitabiibwa to.

106 Tumònààyìbi kàbìdi apa mwaba udiYe musungule bwà mulàmbù kutèekiibwawù, mwaba wùdiYe musungùlè bwà kutèeka mulàmbù awu. Kwèna mwàa kuwùtèeka pa cimwè cyà ku biibi ebi to; kàdi mwaba wùdiYe musungùlè bwà kuwùtèeka, Yèyè mmutèèke kàbìdi ne Dìna Dyèndè mu mwaba awu. Ki cyàkambaYe apa ncyòci aci. Yèyè wàkasungula bwà kutèèkamù Dìna Dyèndè. Mpindyewu tukenketààyì Mifùndù bwà mwaba awu, bwalu ki mwaba ùvwàYe mutèèke Dìna Dyèndè.

107 Mpindyewu tùbalàayi mu cyena-bwalu. Nènku mwaba ne kabeji kakesè kafùnda mwab'ewu kàmvwà . . . mu dindà emu, kalwè kùndi. Twàngatàayi mvensa mwi2 wa nshapita ewu. Mpindyewu, ncyèna muswe kunulama ntanta mupitepite bule to, bwà bantu, bàdi ku telefone pambelu apa. Mpindyewu mvensa mwi2 wa nshapita wa 16 ewu:

*Ki bwà cinyi wêwê neùlambwilè MUKALENGE Nzambi webè paasàkà, wà bimuna byèbè byà mikòòkò ne ngombe yèbè, mu mwaba wikalà MUKALENGE musungule bwà kutèeka dîna dyèndè mwômò amu.*

<sup>108</sup> Mpindyewu, kwêna mwà kwangata eci. . . meeji èbè matòòke ne byònsò byûdi uringa kutonda abi, kwêna ànu mwà kuya naabi ku cyoshelu cyà ba-Méthodistes, ku cyoshelu cyà ba-Baptistes, ku cyoshelu cyà beena Mpenta to, kàdi kùdi cyoshelu mwaba kampànda cidiYe musungùle bwà ne Yèyè. . . bwà kutèekamù Dîna Dyèndè, ne Yèyè neikalè mwà kutwilangana neebè pa mwine mwaba awu. Mpindyewu, wêwê ànu mufikishe bintu byònsò ku dyenda ànu bimpè, nebyende; bintu byònsò bitèeka mu bulongame. Kwòkò nshinga yà nzenbu milamakane, bukènkè abu kabwakulwa to; bwalu mbukòshiiibwe. Nènkupàudi wangata dimwè dyà ku Mèyì à Nzambi anyi ùmwè wà ku myaba Yèndè, kàdi munda mwà mwoyi wèbè wêwè mwine mwikale ne twipàcila twà citu, necikose bukòlè bwà Nzambi ànu mwaba awu. Wêwè ucyènza ne bwalu udi muswe kwikala ne meeji matwe, udi muswe kwikala mushiilàngàne ne muntu mukwàbò, anyi cintu kampànda, ànu mwaba awu mbikòseke, nebítaayishe tunshinga twà midilu. Udi mupiiile. Bìkèngela ulwe ne meeji matòòke, ne mwoyi wèbè wònsò, tubingilà twèbè ne twipacila twèbè tuteeka ànu pa Nzambi. Dîbà adi keba kaaba Kèndè, peta mwaba ùdiYe mwambe, nènkulwàku naawu mwômò amu. Nwamònu anyi?

<sup>109</sup> Tàngilàayi Marta ne Mariya. Pààkaalukila Yesù, paanyimà pà Yèyè mumane kubalongshe Èvànjeeliyò ewu (Bukènkè bwà ditùkù Dyèndè, Yèyè bu Maasiyà), Úvwa mukinyiibwe, mubengiibwe. Kaa, Bafaalèsà ne maèkéleeziyà kuMudyombolawò. Kàdi Lazàrò uvwa mufwè, mwanaàbù wa balùme uvwa mulunda Wendè wa katapula-katèekà. Yèyè wàkamushiya mulàale mwaba awu; ne bôbò kuMutuminabò mukenji, Yèyè nànshapu kulwa.

<sup>110</sup> Kàdi tàngilàayi Marta, lwidi lwèndè. Kwambaye ne: “Mukalenge, bu Wikalapù.” KuMupeshaye mwânzu Wèndè mujaalame: Mukalenge, dileeta dinène M-u-k-a-l-e-n-g-e, *Yahweh*, Yèhowàh. Butumbi’s wè! “Bu Wikalapù, nùnkumwanèètù wa balùme ewu kî mmufwè to.” Mwoyi ne lufù kabyèna mwà kuswikakana mu kajila kàmwèkàmwè to, anyi nzùbu umweumwe awu to. “Wêwè udi mufwànyine. . . Nùnkukî mmufwè to.”

<sup>111</sup> Yesù wàkamwambila ne: “Mémè ndi dibiika dyà ku lufù ne Mwoyi,” mùdi Nzambi wàmba. Nwamònu anyi? PàakambaYe, dyàmbedi ne: “Mwanèènù wa balùme awu neikalè ne mwoyi kàbidi.”

<sup>112</sup> Yèyè ne: “Èyowà’s, Mukalenge, ndi ngiitabuuja nànkucyà bushùwà. Mémè bu mwena Yuda, ndi ngiitabuuja ne nekwikalè

dibiika dyà ku bafwè dyà bantu bônso; ne ndi ngiitabuuja ne mwanèètù wa balùme uvwa mulondi wa mikenji ne wa meeji matòòke mu dikuukwila. Ne ndi ngiitabuuja ne Wèwè ki Maasiyà awu, wákamba mu Bible ne, bwalu Nzambi mwikàle ushindika Díyì Dyèndè munda mwèbè Wèwè ùdi uleeja ne Wèwè ke Musànjeelà wa díbà edi. Wèwè udi Maasiyà awu. Mèmè ndi ngiitabuuja ne Wèwè udi Kilistò uvwa ne cyà kulwa awu, bwalu byenzedi Byèbè mbidi bifila bujaadiki ne Nzambi nguDi mukutume panwapa bwà kwikala Maasiyà awu.” Kaa, ekèlekèle! Tàngilààyì bintu byābangi kunwāngana mpindyewu. Nwamònu anyi?

<sup>113</sup> Mpindyewu, yèyè uvwa ne bukenji bwà kwamba ne: “Bwà cinyi Kwèna mulwè bwà kubiisha mwanèètù? Bwà cinyi Kuvwa mumwondope? S’Uvwa mmwondope bakwàbò. Mulunda webè wa pa mwoyi, kàdi mpindyewu tângila cyàkenzekà.” To, to, kiipacila kàà mùshindù awu kakèèna ne kuyaayaku to.

<sup>114</sup> “Mèmè ndi ngiitabuuja ne Wèwè udi menemene ànu cy’Ùdi mumanyishibwe mu Mifundù aci. Ndi ngiitabuuja ne edi nditùkù divwà dikengela bwà Maasiyà kulwayè; twètù tuvwa badindile. Cidi bakwàbò bamba nànsha ciikàle cinyi. Ndi ngiitabuuja ne mwoyi wànyì wónsò, ku bîndi mumòne ne muumvwe ku Díyì, ne Díyì ndishindikibwe munda Mwèbè, ne Wèwè ki Maasiyà awu.” Nwamònu’s, munda mwèndè menemene amu, yèyè—yèyè uvwa ne cintu kampānda cyà dilōmba, kàdi bìvwa bikēngela bwà kufikaye ku kajila kēna diinā aku.

<sup>115</sup> Kàdi bu yèyè mwà kuya lubilu mwaba awu kwamba ne: “Kàdi pashiishe Wèwè kungambila ne Wèwè ki Maasiyà awu amba’s! Nènku nànsha dimanya disōmba diine, bu muluma wa dipòkò bwà kutwādamuna ku dilōmbà dyètù; pèètù baKudiishe ne baKupe mwaba mu nzùbu, ne bikwàbò byōnsò, bangate luseke Lwèbè, ne bashiya èkèleeziyà yètù, bu m’Uvwà mututumine díyì bwà twètù kupātuka mu mǎngumba awu.” Nwamònu anyi? “Nènku kí twètù aba babishiye, kàdi mpindyewu tudi tubadiibwa bu badyombodiibwe ne bapidye diitabuuja. Ne bintu byōnsò bitùdi baKwenzele ebi, ne kakùyikù nànsha dimanya disōmba dyà ciibidilu bwà kwandamuna ku dibiikila dyānyì?” Mpindyewu, mu bushùwà bwà bwalu, yèyè uvwa ne bukenji abu.

<sup>116</sup> Bu mùdi wamba bwà nsukì yèbè mípì ayi: “Mèmè’s ndi mwena mwàbò wa cyena Àmèrike. Ndi mwà kuvwàla tùpùtulù, kwenza cyōnsò cindi muswè kwenza aci, kí mbibèngiibwe kùdi mikenji to.” Awu mmakenji èbè, kàdi mùkòòkò ùtu misangu yōnsò ànu ujimija makenji àwù. Uh-huh. Wèwè mwikàle mwānà wa mùkòòkò! Kawùtu ne cintu nànsha cimwè to ànu myōsà yāwù, wōwò ùtu ùyilekela iya. Ki makenji àwù adi mafila kùdi Nzambi ngōwò awu, kàdi wōwò udi uàlekela àya.

117 “Mémè ndi ne bukenji bwà kushààla mwena dingumba kanà dyônsò.” Aci ncyà bushùwà menemene, kàdi wêwè udi ubùlekela. Nwamònu anyi?

118 Wàkalekela byônsò bivwaye naabi bu makenji, bwà kujingulula Dìyì dyà Nzambi dimwènèshìibwe ànu mwaba awu kumpàla kwèndè.

119 Yêyè kwamba ne: “Mémè ndi dibiika dyà ku lufù ne Mwoyi. Ewu udi ungiitabuuja Mémè, nànsha byôbì ne mmufwè, kàdi neikale ne mwoyi. Ewu yônsò udi ne mwoyi ne ungiitabuuja Mémè kàadyàkufwàku to. Udi witabuuja eci anyi?” Nwamònu’s, kuvwa kakwàbò kantu kakesè kavwaye kàyi mwanji kupetangana naaku to. Nwamònu anyi?

120 “Éyowà’s, Mukalenge! Ndi ngiitabuuja ne Wêwè udi Kilistò, Mwànà wa Nzambi udi ne mwoyi awu!” Éyì mwanèètù, byônsò bikaavwa pabwìpì ne kubwayika díbà adi mene. Nwamònu anyi?

121 “Nudi bamulààdike penyi?” Nwamònu anyi? Kadi’s nudi bamanyè cyàkenzekà.

122 Nwamònu’s, bikèngela ubwele mu mwaba mujaalame awu kumpàla kwà Yêyè kwakidila mulàmbù wèbè. Nwamònu’s, bikèngela kubwelamu. Mpindyewu, tàngilààyaaku.

*...mu mwaba wàsungula MUKALENGE bwà kutèèkamù dìnà dyèndè amu.*

*Wêwè kwàkudyà dyâmpà dyela lwevenyi mômò amu to;...*

123 Aci cidi cimfwànyì cyà cinyì mu mulàmbù awu? Kùcisambàkajiku ne twitabàâyì kanà yônsò ewu to, bikèngela ciikàle Dìyì. “Kakwikadi mâmpà meela lwevenyi to.” Lwevenyi alu ludi...Nudi bamanyè cidi lwevenyi mu cintu kanà cyônsò’s. “Lwevenyi lukese lùdi lùtùntumuna mutanda mujima,” mutanda mujima awu mMubidi. Kwèna mwà kubwejakù katòbà kàà dingumba anyi twitabàâyì kampànda mu Kilistò to. To, mukalenge, kabyàkukùmbanaku to.

124 Nudi bavùluke diyiiisha dyà mu diinâyì dishààle edi dilòlò anyi? Bayeebè wa kale awu udi ne cyà kwikala mufwè. Ncyà bushùwà. Bayeebè mupyamùpyà n’Dìyì.

*...matùkù mwandamutekète nenùdye mâmpà adi kâyi meela lwevenyi munda,...*

125 “Matùkù mwandamutekète,” adi aleeja cimfwànyì cyà cinyì? Bikondo Mwandamutekète patapata byà Èkèleeziyà, matùkù mwandamutekète. Bwà cinyì bivwa bikèngela bwà kwikalabo bààdya matùkù mwandamutekète? Kumpàla kwà cinyi? Kumpàla kwà kupàtuka. Ne cikondo cyônsò cyà èkèleeziyà, kuumukila ànu ku ntwadijilu too ne ku ndekeelu, bikèngela ciikàle ne mwoyi ànu ku Dìyì dyà Nzambi dyà cikondo aci. Pa nànkù twitabàâyì yènù yà cyena Loomo, ya ba-Méthodistes,

ya ba-Baptistes, ne twitabàayi yà beena Mpenta miine yònsò's mmifwe.

126 Mpindyewu tàngilàayi.

... munda mwàdì, *nànsha dyàmpà dyà lutàtu*; . . .

Bakèngèshìibwe bwà Cyôci aci; Luther, Wesley, beena Mpenta; bwònsò bakèngèshìibwe, ne ki munwikàle peenù.

... *bwalu wêwê wakapatuka mu buloba bwà Ejiipitu mu dilwijakaja*: . . . *udi mwà kushààla mu ditùkù divwà* . . . *wavùluka ditùkù diwàkapàtuka mu buloba bwà Ejiipitu matùkù èbè ònsò à mwoyi*.

*Nènku kakwikadiku dyàmpà dyela lwevenyi dimweka mu* . . . *kùdì mu nseke yèbè yònsò munda mwà matùkù mwandamutekète nànsha*; . . .

127 Mu Mukàjì-musela mulenga kwísù wa Kilistò, paanyimà pàà lufù Lwèndè mu Bikondo Byà Mídimà ku bukalenge bwalabale bwà beena Loomo, ne Yèyè ùvwa ne cyà kufwà ne: “Lutete lwà blé lwòlò kalùyì lumate mu buloba to.” Mubàki uvwa ne cyà kulwa, Mudimu mwowela byanza wà Nzambi mupwàngane. Nwènú bwònsò nuvwa bumvwe diyiisha dyànyì pa cyôci aci.

128 Mwua mwimane kuntu kwaka, mu Los Angeles, mu Forest Lawn amu, dîngà ditùkù, ki mwoyi wanyì kutùpikawù. Mbanganyì bàkaadiku baya ku Forest Lawn? Mùdì lu . . . lupîngù lwà Mòsà lwenza kùdì—kùdì . . . -angelo, ngeela meeji ne, Michelange. Kàdì ndupîngù lupwàngàne, lwònsò nkòòng pa kuumusha ànu pa cinù cyà dyàbalume; kùdì cibangu cyà bwòndòke bwà citùpà cyà cyàla. Nènku mulombodi . . . mvwa ntàngila, ki kulùnfunkwinaye. Kwambayè ne: “Michelange ùvwa mupicishe matùkù èndè à mwôyi munkaci mwà kuteeta bwà—bwà kwenza . . . Ùvwa musongi wà mpîngù, ne ùvwa ùteeta kwenza cimfwànyì cyà Mòsà. Mu meeji èndè amu, ùvwa mu meeji èndè ne civwà mwà kwikala mmwènekèlu was Mòsà. Ùvwa ne cyôci aci munda mwà mwoyi wèndè, civwa cikèngela bwà kwikala mmwènekèlu was Mòsà. Kàdì ke pashìishe yèyè kupicisha matùkù èndè ònsò à mwoyi; ànu wàtapa kakesè apa, kadi e kupeluluja, kupingana cyànyimà e kulùtàngila. Ku cidimu ne ku cidimu, yèyè wàkakwàta mudimu ànu ku lwòlù alu. Ndekeelu wa byònsò pààkajikalu, ke kwalukayè paanyimà kakesè ne kutèekayè mukùsu wèndè ne nsandu wèndè panshi, e kutàngilaye lupîngu alu. Civwa menemene cimfwànyì cipwàngàne cyà Mòsà civwaye naaci mu mwoyi wèndè, mu mùshindù wà ne wàkapàtuka mu yèyè, e kubàkulaye nsandu kàdì e kulùbàngulaye, wela lubila lukolè ne: ‘Akula’s!’” Badi bàlubikila ne *Mudimu Mwowela byanza wà Michelange*. Cintu kampànda cyà cinène civwa munda mwà mwine musongi wa mpîngù awu, lumònu lùvwaye naalu pa mùshindù ùvwa Mòsà ne cyà kwikala, mwikale uleeja mu cimfwànyì cyà Taatù Nzambi munène awu.

<sup>129</sup> Ûkaavwa mu mwoyi Wëndè, kumpàla kwà difùkà dyà dyulu ne buloba, Mwànà, bwalu Yèyè n'Taatù. Kàdi cívwa ànu mu mifungù yà Dìyì Dyèndè. Ki kufukaYè muntu, ne byàkakèngela bwà Yèyè kumutèèka pa budishikaminyi bwà disungula, kàdi muntu awu kuponayè. Kàdi Musongi munène wa mpingù awu, Nzambi, wàkenza muntu ne lupwishi lwà buloba, Yèyè kàkiitaba ne bishaalà nànkù to, Wàkabanga kweza muntu cyàkàbìdì. Ki kwenzaYe Noa, kufwàye mukwàcike maala. Wàkenza Mòsà wàkapangila bwà kushààla mukwàte ku Dìyì Dyèndè. Wàkenza baprofeta bàkanyeemà dībà dyà lutàtu. Kàdi Yèyè wàkatungùnuka ne kwibaka ne kufwimba too ne mwà kenzekabi ne paanyimà pàà cikondo Yèyè ùvwa ùjinga mu—mudimu mwowela byanza, bwà kuMuleeja, ngiikadilu Wèndè, cívwa munda mwà mwoyi Wèndè cívwa mwànà wa balùme ne cyà kwikala.

<sup>130</sup> Dìngà ditùkù, ku Yadène, paanyimà pàà Mudimu mwowela byànza awu mumanè kwikala mufwimbibwe ne mwenjiibwe, ki Yèyè udi upweka ewu mu...pa mapwàpwà à Nkuci, wàmba ne: “Ewu n'Yèyè!” Ûvwa musanke bikolè bwà Mudimu mwowela byànza ewu mu mùshindù wà ne Yèyè wàkaMutapa ku Kàlvariyo, bwà Wamòna mwà kufwà bwà twètù bakwàbò bwònsò bàdi kabàyi bapwàngàne aba; bwà ne ku dyela dyà Mashì Èndè panshi, Yèyè wàmòna mwà kutwàla midimu yàbùngì myowela byanza (miikale Mukàji-musela) kùdi Mwàn'Èndè. Mudimu mwowela byanza ùdi ne cibangu bwalu Nzambi uvwa ne disànkà dyà kumòna Mudimu mwowela byanza wà mùshindù ewu, Wàkamutuuta bwètù bwònsò. Nwamònu anyi? Ke kwàkafwilàYe, bwà kutùpwàngàja twètù bàdi katùyi bapwàngàne. Mudimu mwowela byanza.

<sup>131</sup> Mònaayi, mwòmò emu kwambaYe ne:

*...matùkù mwandamutekète nwènù nenùdye  
dyàmpà didì kadiyi dyela lwevenyi edi.*

<sup>132</sup> Mpindyewu, dyàmpà divwa cifwànyikijilu. Yesù wàkamba ne: “Muntu kààkwikala ne mwoyi ànu ku dyàmpà nkààyaadi to, kàdi ku Dìyì dyònsò.” Kaciyi ànu—ànu Dìyì apa ne kwàka mùdi màngumba maswè kunwitabujiijaDì amu to. Kàdi Dìyì dyà Nzambi ndipwàngàne! N'Nzambi Yèyè mwine mu mmwenekelu wa maleeta, ùbiikidiibwa ne “Dimiinu.” Nènku mùshindù mujaalame wà diitabuuja didì kadiyi disopakaja mu Dìyì adi ke dyàtwàla Dimiinu adi ku Mwoyi wàdi.

<sup>133</sup> Ki cinùtù numòna dilòlò mu dijingulula, ne bintu bikwàbò byònsò ebi, bwalu mmulayi ùdi Nzambi mwenze. E kwimanaYe ku luseke lwànyì ne kucingàmbila, kungambilayè ne “beena mashimi aba nebàjuuke, kàdi shààla mwimane tèndee.” Ndi nCiitabuuja. Ne ki mbwà kabingila kàà citù, bwà kutàpa muntu ku mwoyi to, kàdi bwà kwikala ne kaneemu kùdi Nzambi ne kwenza mudimu ùdiYe mumbiikidile bwà mèmè kwenza, ke bwà



cinyi ndi ngamba maalu aa. Ne Nzambi ùdi ùlwa uwùshindika, wàkidila mulàmbù ne mulàmbù wà mashi, ku diwùshindika ne Mbulelèlè. Kakwena mpatà ku Dyôdi adi to! Mpindyewu tàngilààyì Dìyì adi!

134 Mpindyewu, tudi tumòna apa ne: “*Matùkù mwandamutekète*,” aci mbwà cikondo cyònsò cyà èkèleeziyà. Mpindyewu, bu mùvwà Mudimu mwowela byanza awu ne cyà kufwà, mu lungenyi lwà kubìshiibwa ku bafwè bwà kutùpikula bwònsò, pashìishe Yèyè uvwa ne Èkèleeziyà mutèeka mu bulongame ku Mpenta, kàdi byàkakèngela bwà Èkèleeziyà awu kupicilaye mu mulàmbù kampànda; kàdi beena Loomo kumushebeyabò, kumubwejabò mu buloba.

135 Ànu bu mwena mukàndà ewu, ncyèna mwà kuwùvùluka mpindyewu to, uvwa mungeelùlwile bikolè awu, ne kwambaye ne: “Wa ku démons yònsò, ng’William Branham.” Nwamònu’s, ki cidi dyabùlù ùteeta kwamba ncyòci aci. Yèyè ne: “Bikèènà-kumòna ne bikwàbò,” yèyè ne, “mbyà dyabùlù,” kwambayè ne: “anyì, mwedyanganyi wa ndengama wa mùshindù kampànda, anyì ùkwata mudimu mu mmwenenu mutàmbe cyumwilu.” Bantu bàà mamanya a mu mitù bàtu misangu yònsò ànu bateeta kudifwànyikijila Cì nànkù.

136 Ki mwàkateetabo bwà kudifwànyikijila Yesù. “Udi wenza bintu ebi bishi? Cidi cicyenze cinyi?”

137 Yèyè ne: “Nènnwelè lukonko. Mudimu wà bwambi wà Yone Mubatiiji ùvwa . . . Ùvwa wà kùdì Nzambi anyì ùvwa wà kùdì muntu?” Nwamònu anyi?

138 Bòbò ne: “Katwèna mwà kwamba to.”

139 Yèyè ne: “Nànsha Mémè ncyèna nzwambila to.” Ncyà bushùwà. Bòbò kutùngùnuka. “Kubangila ànu ku dībà adi muntu nànsha umwe kààka Mukonkaku cintu nànsha cìmwè to.” Nwamònu anyi? KubakosaYe ànu cyanààna, Kààkabàmbilaku kantu nànsha kàmwè pa bwalu Abu to; kacìvwa cibàtàngila to. Ùvwa ne mudimu wà kwenza ne Wàkawùjikija.

140 Nzambi atùkwacisheku bwà twètù kwenza cintu cìmwècmwè aci. Katwèna ne cyà kwandamuna ku nkonko yà dyabùlù to, ncyà bushùwà ne: “Wèwè ní udi, enza *cikampànda*.” Udi mwambule bujitu bwà Èvànjeeliyò awu, wèwè bu muiishi, kwàjiki; kabìyi bwà mùshindù Ùdiye mufùndiibwe to, kàdi ànu mwambule bujitu bwà kuMwamba.

141 Nènku bu musadidi, pawikalà mupròfeta, udi mwambule bujitu bwà kùdì Nzambi. Kadi pìikalà bikèènà-kumòna bìdì bìlwa bìdì bitòokesha Mufùndù ewu ne bileeja cidiWu, wèwè udi mwambule bujitu bwà Dìyì dyònsò didi mu Bible awu, bwalu Dyôdi dyònsò ndifùndiibwe kudi bantu bàà mùshindù ùmwè neebà awu. “Nzambi wa kale wàkakwàcila mudimu, ku bapròfetà, ke kufùndabo wa Ci- . . . Bible wa Cijila.” Nwamònu anyi? Nènku mupròfetà mushùwashùwale wa Nzambi nànsha

umwe kàvwàku mwà kuvila Dìyì nànsha òmwè Dyèndè to, kàdi ùdi witabuujà Dìyì dyònsò ne ùyiisha cintu cìmwècìmwè aci. Nènku dībà adi Nzambì mmwenzèjībwe ku kwòkò kajila aku bwà kwenza ne Dìyì adi dyènzekè ànu menemene mùshindù ùdiDi dilayībwe, Dimiinu nedikolè.

<sup>142</sup> Mpindyewu, mònaayi kàbìdì, ne lukasa lwònsò, tudì tusangana kaaba aka ne matùkù ònsò mwandamutekète avwa dyàmpà edi ne cyà kudiibwa awu, mu Bikondo Mwandamutekète byà Èkèleeziyà. Mpindyewu, pàvwadi ne cyà kufwà ne kubwela mu buloba.

<sup>143</sup> Nènku mudyûdyanganyi mwine uvwa mwakule bwànyì mèmè awu, kwamba ne: “Bwà Nzambì unùdì nwènù nukuukwila, uvwa mwà kwikala musòmbe mu Bikondo Byà Mìdimà ne mutangile baamaamù abu, ne mafù miimita, bàmwè bàà kudibo biikàle ne bàna bakesè mu mabòko, bantu bàà meeji matòòke, bèediibwa mu cipalu ne nyama yà ntambwe yibasunsulula tupesetupese, biine abu beela mbila; bàbàpoopela ku nkuruse ne baboosha mu kapyà; bavuula bakàjì abu bilàmbà bashààla butaka, nsongààkàjì virgo, ne bàbàkudimuna mùshindù ewu, kàdi kulekelela nyama yà ntambwe pambidi pààbò.” Yèyè ne: “Nzambì kampànda uvwa mwà kwikala musòmbe mu Dyulu, uvwa ne cyà kwikala pa nkwasa Wendè wa butumbi, ne mutàngile panshi kàdi kwamba ne Yèyè udi ùsankila cyòci aci,” mwàkambayè.

<sup>144</sup> Dībà adi, nwamònu’s, awu mmwenenu wa mamanya a mu mutù udi wa dyabulu. Bu ne muntu awu ùvwa wa nyuma, nùnkù’s mmumanye ne bìvwa bìkèngela bwà lutete lwà blé alu lùfwe, bìvwa bìkèngela kujiikiibwalu mu kàtèdralè kàà beena Loomo.

<sup>145</sup> Kadi pashìishe kaamutoloko kakesè kàà Mwoyi kupatukaku mu dilongolola dyà Martin Luther, ne: “Mwakane kààkwikala ne mwoyi ku dyàmpa dibènèshìibwe dyà kosher didì nsaserdose ufila to, kàdi ku Dìyì dyà Nzambì. ‘Mwakane neikale ne mwoyi ku diitabuujà!’” Yèyè wakapàtula matàmbà àbìdì. Lutete lwà blé lwàkabanga kukola.

<sup>146</sup> Pashìishe kulwaku John Wesley e kusakidilaye ku cyòci aci. (Kuvwa bakwàbò bààbùngì, bavwa. . . Zwingli ne bakwàbò kupatukabo kàdi kuvilabo dilediibwa dyà kùdì virgo, nènku kufwàdi.) Kàdi pashìishe kulondaku ba-Méthodistes, mwépu, bungungu, ditùkù dyà mpandanjila. Ki bôbò kuyiishabò dijidiibwa; e kusakidilào mwépu.

<sup>147</sup> Pashìishe ki beena Mpenta kulwàbò mu cizubu, bùngibù, bwà kuseeswisha Basungula. Cìmweka ànu bu lutete lwà bushùwà lwà blé, padibo bàcìkanguka, kamwèna blé nànsha bwà kàna to. Kàdi Mwoyi ùdi upicila mu cizubu.

<sup>148</sup> Mpindyewu, nukaadiku bamòne, bidimu bisatu byònsò paanyimà pàà di—disangisha dinène, cidì cyenzeka anyi?

Dingumba's. Bwà eci bidimu byākùmbanyi makumi àbìdì kàdì kakùyì dingumba nànsha òmwè to. Mwànà wa mùkòòkò munanga udi upùnga ne lufù, swaku bwà kacyènjikù nànkù to. Mèmè muyè mu lukòngò elu, swàku bwà bantu bàdì biitabuuja Mukenji ewu kabashààdiku kwitaba bwà kwenza òmwè nànsha byà kumòna lufù to! Nzambi neenzè... Nenùfwile ànu mu njila wenù mene! Nwavùlukaayi aci! Pa dībà mene dinùdì nuteela òmwè nànkù, nànsha nùwè ne meeji matòòke à bishi, nwangata muntu bu mulombodi wenù pamutù pàà Nyumà Mwìmpè bwà kushindika Dìyì edi, ki dībà dinùdì nufwà ndyòdì adi! Dimiinu dishùwashùwale kadyènakù mwà kwenza nànkù to, bwalu kakwena cintu nànsha cìmwè cìdì cishààle paanyimà pàà dimiinu to, ncintu ànu cìmwècìmwè aci cìvwàku kale ku cìbangidilu aci. M'Mukàjì-musela wàkamata mu buloba bwà kulelaye cyàkàbìdì lutete lwà blé.

149 Mònaayi:

...matùkù mwandamutekète nwènù nenùdye  
dyàmpà kadiyi dyela lwevenyi...

150 Nènku nekwìkale ne Mukàjì-musèla...

151 Mpindyewu, nwènù bàvwà ne maamù mukulakaji wa wela mbila wa ba-Méthodistes awu, ne bikwàbò, nwènù bàvwà badikonka ne “Yèyè kayi mwakule mu myakulu to, kaakwikalamu to.” Aci mmafi! Yèyè ùvwa Nyumà Mwìmpè umweumwe ùdì nendè leelù ewu awu, kàdì uvwa mu mmwenekelu wa mwèpu, kabìyi dyalujulula dyà mapà to. Kàdì matùkù ònsò mwandamutekète, nudyè ànu dyàmpà kadiyi dyela lwevenyi to, Dìyì adi's. Bòbò, kale wàwa, bòbò bààkadyenza òmwè abu, s'mbafwè. Bàdì cìkolakola, nebàkungujiibwe ànu kaaba kàmwè ne kwoshiibwabò. Kàdì Mwoyi udi utungunuka ànu nànkù too ne ku ndekeelu. Kàdì cìdì cyenzeka ncinyi? Mwoyi wònsò ùvwa mu cìkolakola, mu mwèpu, mu cizubu, wònsò ùdì ùshìikidila mu blé. Nènku Nyumà Mwìmpè umweumwe wakatwàla Luther, wakatwàla Wesley, wakatwàla beena Mpenta awu, ùdì ùshìikidila mu Mukàjì-musèla ku dibìika dyà ku lufù.

152 “Matùkù mwandamutekète, bàdya dyàmpà kadiyi dyela lwevenyi to.” Lwevenyi nànsha lukese kalwakusanganyibwa munkaci mwà Mukàjì-musèla to, dìyì nànsha—nànsha òmwè disàkidila, anyi cintu nànsha cìmwè. Vùlukààyì ne, dìyì òmwèpelè ndyàkalela lufù lwònsò lùdì pa buloba elu; mwànà yònsò mulela mu masandi wàkalediibwa bwalu Evà, èkèleeziyà wa kumpàla, mukàjì-musèla wa Adama wa dyàmbedi, wàkeela Dìyì dyà Nzambi mpatà kadi kwitabayè dyumvwija dyà dingumba, anyi dyà dimanya dyà mu mutù anyi dyà maalù à kàlaasà dyàDì; bwalu Cyàkalukakajiibwa mu lungenyi, ne: “Bulelèlè, Nzambi ùdì Nzambi mwìmpè.” Nzambi ùdì Nzambi

mwímpè, kàdi Yèyè ùdi kàbìdì Nzambi mwakàne. Tudi ne cyà kushààla bakwàte ku Dìyì Dyèndè! Kàlaasà, ke kààkiitabayè.

153 Ki mwaba ùdi bàmwè bàà ku nwènù nsongaàlùme yà mu seminèrè, kakùyì mpàta to biikale ne dibiikila mu mwoyi wènù, kàdi nunyeemena ku cilongelu kampànda cyà Bible bwà kunubwejabò dilongesha edi munda mwènù, kàdi's ke mwaba unùdì nufwila ngwówò awu... Shààlaayi ne Nzambi ne Dìyì Dyèndè. Kabààkunùlekelaku to; anyì, kanwèna nànsha mwà kwikala beena disangisha dyàbò to, kabààkunwitaabaku pa cibumbà cyà ku cyambilu to. Nànku awu bàlekèèlaayici, lekelaayi bafwè bajikè bafwè, tulondaayi twètù Kilistò Dìyì.

154 Mpindyewu, matùkù mwandamutekète awu kamwàkwikala lwevènyì lusopakaja mu Mukàji-musèla to, Èkèleeziyà, matùkù mwandamutekète.

155 Mpindyewu mònayì. Mpindyewu bu kakùyì. . .

*Ne kakwàkwikala dyàmpà dyela lwevènyì dimwènèka munkaci mwènù nànsha ku luseke lwèbè kwònsò matùkù mwandamutekète;... (Mulàmbù mwaba ewu ncimfwànyì: Mukàji-musèla upàtukila mu Mulàmbù ùdi mwikàle Kilistò.) ...nànsha kakwàdyà kwikale cintu kampànda cyà musunya, cyùdì mulàmbùle ditùkù dyà kumpàla too ne ku dilòlò,...*

156 Nènku vùlukààyi—nudi bavùluke mùshindù utùdì bafùma ku dilonga Bikondo byà Èkèleeziyà anyì? Mùsànjeela mutumina èkèleeziyà ùtu misangu yònsò ulwa ànu ku difwà dyà cikondo cikwàbò cyà èkèleeziyà, misangu yònsò. Difwà dyà Mpenta didi ditwàla dyambwibwa dyà Mukàji-musèla. Nwamònu anyì? Difwà dyà Luther kutwàladi Wesley. Nwamònu anyì? Difwà dyà Wesley kutwàladi Mpenta. Difwà dyà Mpenta didi ditwàla Mukenji mpindyewu. S'ki wówò ewu, ùdi mwab'ewu mene, citembelu munda mwà Mifùndù yònsò nkòong. Kakwènaku Mufùndù mu Bible ùdi kawùyì ànu ùswikakana ne mukwàbò to. Nwamònu anyì? Bifwànyìkijilu byònsò ebi. Mémè ncyèna ne kàlaasà kàndì mulonge to, kàdi ndi ne Nyumà Mwímpè udi undeeja ku kajila kakwàbò kàa kucilongeshila, nkuumukila ku bufùki; ne aci nku Dìyì. Bìkèngela ciikàle Dìyì, bintu bidì bilayìbwe.

*...mubidi,...mulambu ditùkù dyà kumpàla...  
nànsha, ushààla bufùkù bujimà too ne mu dindà.*

157 Mpindyewu, nànsha Luther mwine, ùvwa ne Bulelèlè ne mulongeshe èkèleeziyà ne “mwakàne neikale ne mwoyi ku diitabuuja.” Kwèna muswè kushààla mweyemene aci bu ne ndilongesha dyà mu kaabujimà to, mu cikondo cyà ba-Méthodistes. Ciwènzà ncinyì? Ucyòshe mu kapyà. Civwa cimfwànyì cyà ncinyì? Dingumba didi dipatuka mu Dìyì adi ditu ncizubu, cicolakola, bizubu abi, bidì ne cyà kwoshiibwa mu kapyà. Citùpa cyà cyena mangumba cididi dipàtukile aci

kacyèna ne cyà kushàalakù to, cìdi ne cyà kufwà. Kanùcishiyiku to too ne kudipatuka dyà cikwàbò—cikwàbò cikondo, cyoshaayi cibutuke butubutu mu kapyà! Ûdi munkaci mwà kwakula mpindyewu ne Mukàjì-musèla ewu, ànu Mukàjì-musèla patùpu, wenda upicila mu cikondo ne cikondo cyònsò.

158 Mònaayi mudibi bilenga's we: "Mashi a mwànà wa mùkòòkò." Bòbò aba ki Mubidi wa Kilistò, Mulambu: mashi a mwànà wa mùkòòkò ku ciibi. Mpindyewu, vùlukaàyi ne, mwànà wa mùkòòkò uvwa mushipa awu ùvwa cimfwànyi cyà Kilistò.

159 Anyi tudi bafwànyine kwangata dībā dyàbūngi, kadi ncyèna naadi... ànu tusunsa tukwàbò tukese cyanààna bwà kushàala mwaba ewu. Bidi mwà kukèngela bwà mèmè kwimanyika bwà kubanga cyàkàbidi dilòlò edi, nwamònu's, bwalu nyewù twangata mukungùlù mupitepite bule. Cìdi... Ndi ne mabeji makumi àbidi à cyòci eci mwab'ewu, a bìndi mufunde, pa cyena-bwalu cimwèpelè eci.

160 Mònaayi mpindyewu, pa cyòci eci, mwànà wa—wa mùkòòkò awu uvwa n'Kilistò mu mmwenekelu wa difwanyikija. Anyi ndi mucyambe bimpè anyi? Cifwànyikijilu; Kilistò nguvwa Mwànà wa mùkòòkò. Ûvwa ne cyà kwikala wa mpàngà, wà kumpàla mulela kùdi mùkòòkò wà dishinà mukolè; anyi mùkòòkò wà dishinà, mwònsò munwàsungula bwà kuwùbikila amu. Ûdi ne cyà kwikala wèndè wà kumpàla ku dilela. Ne ùdi ne cyà kwikala muteeciibwe bwà kumòna ne kawèna ne kalema nànsha kàmwè pambidi.

161 Mpindyewu, Kilistò ùvwa muteeciibwe; mwànà wa mùkòòkò mulela wa kumpàla kùdi maamù mùkòòkò awu, Mariya virgo awu. Kadi ùvwa muteeciibwe kùdi cinyi? Sàtaanà ulwisha Dìyi. Mmwenze ànu ùdikuma kùdi Eva anyi, ewu kudishindaye; ùdikuma kùdi Mòsà anyi, e kudishindaye; kadi mmwenze ànu usemena kuntwaku bwà kulwisha Kilistò, ne kuteeta bwà kuMutèelela Mufundu bibi, uh-huh, wàkajandula ne awu kàvwa Mòsà to. Nwamònu anyi? Ûvwa mwediibwe ku diteeta. Wàkenza cinyi... kukudimukaye, kwambaye ne: "Wèwè ní udi Mwànà wa Nzambi. Mpindyewu bàdi bangambila ne Wèwè udi wenza bishimà, ne bòbò bàdi bangambila ne Maasiyà ke udi ne cyà kwenza cyòci aci. Mpindyewu, piikalabi ne bìdi nànkù, Wèwè udi ne nzala, Kwèna mudyè to, andamuna bintu ebi bilwe mampà, anyi, mabwe aa alwe mampà, nènku ùdye."

162 Yèyè ne: "Bààkafunda ne: 'Muntu kààkwikala ne mwoyi ànu ku dyàmpà nkààyaadi to.'" Twitabàayi Webe, ne bikwàbò. Kadi ku cinyi? Dìyi dyònsò! Citùpà cyà Dìyi anyi? "Dìyi dyònsò didi dipàtuka mukana mwà Nzambi." Ki ku cyòci aci kùdi muntu ne mwoyi. Nwamònu anyi? Mwànà wa mùkòòkò wàkateeciibwa, bwà kumòna ne kùdikù mwaba kampànda ùvwa Ye mudishinde.

<sup>163</sup> Bafaalèsà kwambabò ne: “Éyì Laabì, Wêwè Mupròfètà wa citende, tudi twela meeji ne Udi mulenga be. Udi mwîmpè be.”

<sup>164</sup> “Nudi nuMbiikila mwîmpè bwà cinyì? Kudi mwîmpè ànu Umwèpelè, ne mwine awu n’Nzambì. Nudi nwitabuuja nànkù anyì?”

<sup>165</sup> “Kaa, èyowà’s. Nzambì.”

<sup>166</sup> “Èè, Mémè’s ki Yêyè awu, dîbà adi.” Uh-huh. “Nwênù’s nudi bâmbe ne kùdì mwîmpè ànu Umwèpelè. Bwà cinyì nudi nuMbiikila ne ‘mwîmpè,’ panùdì kanùyì nwitabuuja ne Mémè ndi Nzambì?” Uh-huh. “Kàdì nudi nuMbiikila mwîmpè bwà cinyì? Cìdì cyenza ne nwènzà nànkù ncinyì? Ncinyì cìdì cinusonsola bwà kwamba ciine aci, panùdì bamanye ne kùdì mwîmpè ànu umwèpelè, ne mwine awu n’Nzambì?”

<sup>167</sup> “Tudi bamanye ne Wêwè kwêna uneemeka muntu anyì dîyì dyà mulongo wèndè to. Tudi bamanye nànkù.” Kuteeta . . . Ûvwa mumanye mwena lubombo awu. Nwamònu anyì?

<sup>168</sup> Ûvwa muteeciibwe bwà kumòna kaaba kavwaye mwimanyine, nwamònu’s, muteeciibwe mu mishindù yònsò, muteeciibwe bu mutùdì tuteeciibw’emu. Kadi kakùvwa byà dilekela, kudiYe to, nànsha kakesè. To, mukalenge! Ûvwa m’Mwànà wa Nzambì.

<sup>169</sup> Nènku mwànà wa mùkòòkò awu wàkateeciibwa, ne wàkalamiibwa munda mwà matùkù dikumi ne anaayi. Aci civwa n’Nsabatu yìbìdì, anyì bikondo bìbìdì. Umwe mbwà beena Yuda, mwàkalambulabo mwànà wa mùkòòkò mu cifwànyìkijilu; umwe ùdì bwà bàà Bisàmbà byà bèndè, bàdì ne Mwànà wa mùkòòkò mulelèlè, ne bwònsò bwàbò bààkavwijibwa bapwàngàne ku diitabuuja dyà Mwànà wa mùkòòkò ewu uvwa ne cyà kulwa. Kàdì Yêyè wàkateeciibwa munda mwà dikumi ne anaayi. . . anyì wàkakenkeciibwa munda matùkù dikumi ne anaayi, Yêyè uùvwa Dîyì.

<sup>170</sup> Nènku udi mwà kukenketa Dipungila Dikulukulu, wamba ne “Dìdì dipiìsha Dipyadiyà.” Udi mu ntuakanyi! Dipungila Dikulukulu ditu ànu difila bujaadiki bwà Dipyadiyà.

<sup>171</sup> Muntu kampànda ùvwa ne cyà kungeela kadyòmbò ànu àbìdì àdì panshi aa, kwambaye ne: “Mbwalu kaayi nendè yêyè?” Yêyè ne: “Èè, wa bwalu s’udi mene ulongesha Dipungila Dikulukulu.” Muiyishi wa beena Kilistò, anji elààyiku pèènù meeji ku bwalu abu tûng. Yêyè ne: “Dipungila Dikulukulu’s ndifwè ne dipite.” Kaa, to! Kaa, to! Dìdì ànu mulongeshi cyanààna, udi mwà kutuleeja cìdì cìfùnda ku cimanu. Nwamònu anyì? Ncyà bushùwà.

<sup>172</sup> Mpindyewu, nwamònu’s, matùkù dikumi ne anaayi ùvwa muteeciibwe, awu ùvwa n’Kilistò. Mpindyewu mònaayi, pashìshe yêyè wàkashipiibwa ku dîbà dyà dilòlò, bìvwa bikèngela bamushipe, mwànà wa mùkòòkò awu’s. Kilistò

wàkafwà pa díbà dyà dílòlò, mu mapingaja. Ne pashiishe mònaayi, díbà adi yéyè ùvwa kàbídi. . .

<sup>173</sup> Bìvwa bikèngela bwà mashi kutèekiibwawù pa makunji a ciibi, nwamònu's, bwalu mashi adi mwoyi wà nyama. "Nenùdye munyiinyi wàwù; kàdi mashi àwù adi mwoyi, apongololaayi." Nwamònu anyi? Bìvwa ne cyà kwikala. . . Mashi àvwa ne cyà kulabiibwa pa mukamba wa makunji à ku ciibi cyà nzùbu mùvwà mulàmbù mwitabiibwe amu. Butùmbi's wè! Mwoyi ncinyi? Dìna adi. Aci. . . Wàkatèeka dìna dya muntu awu. . . Nudi nubànda ku ciibi, ne nudi nutàngila ne ndìna kaayi dìdi ku ciibi kumpàla kwà nwènù kwela kaangonga. Nwamònu anyi? Mashi àvwa alaabiibwa pa mukamba wa ciibi bu cimfwànyì cyà civwà mulàmbù mwikale munda.

<sup>174</sup> Mpindyewu netùpete mwaba wa dikuukwila, ànu mwómò amu mene, twenda tupidila mu Mashi awu. Mònaayi, mashi ku ciibi àvwa àmba dìna dyà civwa munkaci. . . civwa munda amu, bavwa munda amu. Mwaba wètù wa dikuukwila, Mwànà wa mùkòòkò, n'Dìyi. Tudi bamanye aci.

<sup>175</sup> Mpindyewu, mvensa mwi4, mònaayi: "Kanùshiyi dyàmpà, kanùshiyi cintu nànsha cimwè cyà ku mulambu," anyi, kanwàngaci wà mu eci cikondo kubwela nawù mu cikondo cikwàbò nànsha.

<sup>176</sup> Kuteeta bwà kwalukila cyànyimà kàdi kwamba ne: "Èè, mpindyewu, twètù tudi ba-Luthériens, tudi baswè kubànda kuneeku," bikèngela nufwe ku cikondo cyà ba-Luthériens bwà kulediibwa mu cikondo cyà Wesley. Bikèngela nufwe mu cikondo cyà Wesley bwà kulediibwa mu cikondo cyà beena Mpenta. Ne bìdi bikèngela bwà nwènù kufwà mu cikondo cyà beena Mpenta, kanùlekedikù kantu nànsha kàmwè kàà ku cyòci kashààla to, wòshààyi mu kapyà, bwàlu nebyòshiiibwe bu cicolakola mùdi blé mupàtùkile amu. Cicolakola aci, dīgumba adi, cidi ne cyà kwoshiibwa. Pa nànkù kanùtwadikù dīgumba dyènù mu Mukenji mupyamùpyà to. Edi ki Dìyi mpindyewu. Aci ke cidi cidyenze dīgumba aci, cicolakola; nciDitwale, mmwòmò; kàdi nDifikè too ne *apa*, pashiishe cicolakola kufwaci. Civwa ncyàmbudi, dīgumba adi's, kàdi Dìyi dìdi diya ànu kumpàla. Èyowà, Dìyi dìdi diya ànu kumpàla.

<sup>177</sup> Mpindyewu twangate mvensa mwi5 ne mwi6. Mònaayi: "Kàbiyi. . ." Mpindyewu twàngatààyi mvensa mwi5 ne mwi6.

*Kwèna mwà kulambula paasàkà mu cimwè cyà ku biibi, cidi MUKALENGE Nzambi wèbè ukupa nànsha:*

<sup>178</sup> Mpindyewu vùlukààyi ne: "Kí mmu cimwè cyà ku biibi ebi to." Mukalenge ngudi munwànyishile bwà nwènù kwikala ne màngumba aa, nwamònu's, "biibi ebi."

*Kàdi mu mwaba ùdì wàsungula MUKALENGE. . . Nzambi bwà kutèekamù dìna dyèndè, . . .*

179 Ki Ciibi ncyôcì aci, mwaba wùmwèpelè. “Ki mmu cìmwè cyà ku biibi ebi to.” Kàdi Nzambì ngudi ne Ciibi.

180 Wèwè udi wamba ne: “Dìndà dyònsò mémè ntu mbwela mu ciibi cyà ba-Méthodistes.” Ki èkèleeziyà nyèyè awu. “Dìndà dyònsò mémè ntu mbwela mu ciibi cyà Kàtòlikè.” Uh-huh. Èè, Mukalenge ùdi ulekela bantu Bèndè babwela ne bàpàtuka mu biibi abi. Nzambì udi ne bantu mu èkèleeziyà wa Kàtòlikè, èkèleeziyà wa ba-Méthodistes, èkèleeziyà wa ba-Presbytériens, bwònsò abu, beena Mpenta. Cyà bushùwà, kàdi kwèna . . . kwèna ukuukwila Mukalenge mu ciibi aci to. Wamònu anyi? Kàdi Mukalenge ùdi ne ciibi kampànda. Butùmbi’s wè! Yèyè ùdi ne ciibi.

*Kàdi mu mwaba ùdi MUKALENGE Nzambì webè . . .  
musungùle bwà kutèèkamù dìnà dyèndè, mwómò  
amu . . . ke muwikala mwà kulambùla paasàkà ku  
dilòlò . . .*

181 Ndìbà kaayi divwa Lebèkà musangane Izàkà? Ndìbà kaayi dyàkamubiikila Eliezer bwà kwikalayè mukàjì-musèla? Nku ìbaamulòlò!

Nekwikale Bukènkè lwà ku ìbaamulòlò,  
Njila wa ku Butùmbi nenùmupete bulelèlè;  
Mu njila wa mâyì awu ke mùdì Bukènkè leelù  
ewu,  
Bajikiibwe mu Dìnà dyà musinga dyà Yesù.  
Bànà ne bakolè, nyingàlalaayi ku mpèkaatù  
yènú yònsò,  
Nyumà Mwîmpè neàbwelè bushùwà  
menemene;  
Makènkè à dilòlò àfikì,  
Mbulelèlè ne Nzambì ne Kilistò bàdi umwe.

182 Ki cìvwa ntwadijilu waCì, mpindyewu ncikabwela mu Bukènkè Mukàjì-musèla. Nudi bùmvwè cìndì muswè kwamba aci anyi?

183 Mbîmpè njikijile mwaba ewu, kubanga cyàkàbìdì dilòlò edi, bwalu ncyèna muswè bwà nwènú kushiya eci to, nudi numòna’s. To, to, cikaadi—cikaadi ncikondo cyà didyà dyà mundaamuunyà. Èè, èè, ndi ne tubeji búngi cyanààná tùndì mufùnde mwab’ewu. Kaa, ekèlekèle! Kàdi bishi bwà dilòlò edi, aci ncifwànyine kwikala cîmpè anyi? [Disangisha dìdì dyàmba ne: “To. Mpindyewu.”—Muf.] Huh? Èè, panwikalà . . . Nudi baswè bwà kuteeta ne kuya kumpàla ndambu anyi? [“Èyowà. Amen.”] Èyo, nànkù tuyaaayi kumpàla ndambu, netùlwijakaje ne lukasa lwònsò. Mbîmpè nànkù anyi?

184 Mpindyewu, kubwelela penyì? “Kwakubwela ku ciibi nànsha cìmwè cìdì Mukalenge Nzambì mukupèèshe to, kàdi ku ciibi cìikalà Mukalenge mwà kutèèkamu Dìnà Dyèndè aci.” Ki nkubwela mu nzùbu wa—wa ciibi cìdì ciibi aci to. Ncyà bushùwà



anyi? Nzambi nèateekè Dîna Dyèndè ku ciibi, ne wèwè kùyi . . . Ki ciibi cidi cibwela mu mwaba wà dikuukwila ncyôci aci, mu mwaba wa cijila. Kwêna ubwelamu ne mulàmbù wèbè ku cyônsò cyà ku biibi ebi to, kàdi mu ciibi cidi Mukalenge Nzambi usungula bwà kutèeka Dîna Dyèndè. Nwamònu anyi?

<sup>185</sup> Mpindyewu, Wàkacyènza anyi? Ciibi aci cidi penyi? Mu Yone Munsantu 10, Yesù wàkamba ne: “Mémè ki Ciibi, Ciibi aci. Mémè ki Ciibi cyà Nzùbu wa Nzambi. Mémè ndi Ciibi cyà cikùmbi cyà mikòòkò.” Kí ncikùmbi cyà mbuji to, cikùmbi cyà mikòòkò. Nwamònu anyi? “Mémè ki Ciibi cyà cikùmbi cyà mikòòkò. Muntu ùdi mwà kubwelela mu Ciibi eci, kwikalayè mukubiibwe.”

<sup>186</sup> Nènku mpindyewu tudi mwà kunènga ntàntà mule pa cyôci aci. Kadi, bwa kulaminyina díbà, Yèyè ki Ciibi cyà cikùmbi cyà mikòòkò aci. Mpindyewu, tudi baswe kumòna apa, mindidimbi ne bimfwànyì bìdi menemene bimwenekela mwaba ewu, kàdi ndi . . . mémè mwangàte aci cibadi ndi mufwànyine . . . nebìnulame katanci.

<sup>187</sup> Èyo, mònaayi, eci cidi cipatula patòòke bipwàngàne, Yesù Kilistò. Bwalu Dipungila Dikulukulu dyônsò ncifwànyikijilu Cyèndè, maafesto ônsò, dikuukwila dyônsò, ne bikwàbò byônsò. Ne ndi mufunde kaaba aka, mwinshi mwà milongo yà Mifundù eyi ne: “Cyûmvwijaayaaku.” Ki mwaba ngwôwò awu ùdici cìfwànyine kwangata mukùngùlù mule. Umvwijaayaaku tûng muvwa maafesto ônsò . . . Nànsha mulàmbù wa bukula ùvwa cimfwànyì cyà Kilistò. Twàngatààyi ànu wôwò awu cyanààna.

<sup>188</sup> Musangu kampànda kuvwa ci—cilongelu kampànda civwa cibìikidiibwa ne ncilongelu cyà bambi, anyi cilongelu cyà baprofetà. Bavwa balongeshiibwe, baprofeta balonge tulaasà. Nènku kuvwa mupròfetà mushùwashùwale, muprofeta—mubiikila kùdi Nzambi musangu kampànda uvwa muya bwà kubamwenekela. Èè, bavwa baswè kuleeja mupròfetà mununu awu nsòmbelu mulenga, nànkù ke umwe wàbò kuyayè katuula cisumbu cinène cyà bìvwaye wela meeji ne civwa nkunde; kàdi bìvwa bilòwalowa byà lulengu, ne uvwa ne cyà kubadiishabi bwônsò.

<sup>189</sup> Kaa! Mmàlòngà búngì kaayi à mu seminère atùdi bapetà! Nwamònu anyi? Mmwômò. Bàdi munkaci mwà kulàmba cintu kampànda. Nwamònu anyi? Bàdi ne málòngà à ba-Méthodistes, málòngà à ba-Baptistes, málòngà à beena Mpenta. Kàdi, nudi numòna's, bàdi dikwàma diibìdì, diikalàbo mwà kusònzà ku mucì. Nwamònu's, kabìyi ku mwonji wa Mvinyo wa munène awu to. Ùdi ukwama bimuma byà mpùsù, byà mbòmà, ne bikwàbò; kabìyi byà orange to, kàdi biikale ànu bàmba mudibo madimà.

<sup>190</sup> Mònaayi kàbìdì. Mpindyewu, mu eci—mu eci, pààkalwà Eliyà ne kubatangila, kàdi kumònayè ne bìvwa mbilòwalowa byà

mulùngù bivwa bifwànyine kushipa muntu ne muntu wa kùdibo, kwambabo ne: “Bakwètù wanyì, s’tudi ne lufù mu lwesù!”

<sup>191</sup> Yèyè ne: “Ntwàdilaayi dyanza dyà bukula.” Ki kwelayemu bukula, yèyè ne: “Mpindyewu mbîmpè, dyayi munùdi baswè.” Byàkashintulula lufù kulwalù mwoyi.

<sup>192</sup> Nènku mulàmbù wà bukula wàkafidiibwa kùdi Kilistò. . . Yèyè nguvwa Mulàmbù wà bukula, nènku mulàmbù wà bukula awu ùdi ne cyà kupediibwa ne mpelù uvwa mwà kupela kasèka kwònsò kàà bukula abu mu mùshindù wà mwomùmwe, bìdi bileeja ne Yèyè ùdi umweumwe awu makèèlèlè, leelù, too ne kashidi. Yèyè udi cintu cimwècimwè aci cyà kubweja mu dîngumba dyènù adi nènku ki dyòdi kwikala ne mwoyi: Dìyì! Kilistò ùdi Dìyì, bifwànyikijilu byònsò byà cintu cyònsò: tabernacle, mà—mà—màmpà à baakwidi, byònsò. Dyàmpà dyà koshner dicibula pa dîlôngà òvwa mubidi Wèndè mucibulà, dicidi beena Yuda kabàyi ànu mwà kumvwijaku ne mbwà cinyi bàdi bàcyenza to. Nwamònu anyi? Nènku bintu bikwàbò byònsò ebi bivwa cifwànyikijilu Cyèndè.

<sup>193</sup> Mpindyewu, dîbà adi, Yèyè mumweneke patòòke, tudi tumòna mpindyewu màngumba ònsò ne twitabàayi bikàadi bishiya paanyimà; bwalu Yèyè ùdi Dìyì dyà Nzambì dikezuke, didi kadiyi mwà kushintuluka, didi dyàmpà kadiyi dyela lwevenyi to, Yone Munsantu 1. Ncyà bushùwà, Yèyè ùdi Dyàmpà didi kadiyi dyela lwevenyi to. Nànku dîbà dyùdi usakidila *cikampànda* anyi usakidila *cikansanga*, ndwevenyi lusakidila ku Cikaavwa cimana kunùpèsha ku cibangidilu aci.

<sup>194</sup> Tàngilàayi kuneeku. Cìdi munkaci mwà kushipa bukwbantu leelù ewu ncinyi? Bàdi bangata ne basopakaja maminu. Nènku panùdi nuàsopakaja, nudi nuàshipa’s. “Kaa, didi dîmwèka ditàmba bulenga.” Ncyà bushùwà! Ditalà disopakaja: bipòdipòdi byà matalà, nsèke yònsò yìdi yifumina ku matalà. Ditalà disopakaja: ndinène, didyùnde, bikolakola bîmpè bile, ne mivungu minène midyùnde, dîmwèka dîmpè misangu yìbìdi kupita dikwàbò. Kàdi ndufù! Maalu à mamanya mene mmajandule cyòci aci. Nwamònu anyi? Kànùbisambakaji to, nebinùshipe.

<sup>195</sup> Mpindyewu, mwab’ewu, indilaayi nnuleejè. Dîngà ditùkù mvwa munkaci mwà kwela màyi ku bilòngò mu lubànzà lwànyì. Kàdi inàbànzà awu ùvwa ne bilòngò bisopakaja bivwa mu kanyingù kaaba aka, anyi kaadibulà kakesè kàà bilòngò ku luseke lwà nzùbu. Tudi ne cyà kwela bintu abi màyi misangu yòyi mikesè nyisatu ku lumingu, anyi yinaayi, cyanààna bifwafwa. Nènku kuntwaku kùvwa mucì wà cifùkilu mu bulà amu. Mvula kayivwaku miloke kuntwaku munda mwà ngondo yisambòmbò to, ànu munanga. . . Mvula yèyè muloke, mu tusunsa dikumi nudi mwà kumòna mùdi lupwishi lubànda. Kàdi kantanyì kakesè kàvwa pambelu apu aku, kalenga kàà wòò kabalakana bikolè

kutàmba cyà cisopakaja aci ne mâyi ônsò awu. Wêwè kuyi mucyele mâyi to, cifwafwa. Kàdi mmwaba kaayi uvwaye mupete mâyi èndè? Nènku cintu cikiwàbò, udi ne cyà kutùngùnuka ne kubyela bwanga ditùkù dyônsò anyi matùkù àbìdì, bwà kwipatakù twìshi. Cyanaàna, twìshi netùcidye cyônsò, ncitamba kunefuka ne kuteketa. Kadi kakwèna kîshì kikalà mwà kwimana pa cyà ku cifùkulu aci to. To, to! Nekàlandalapu e kuyakù kule. Cyôci ncyà ku cifùkulu! Nudi numòna cìdì disopakaja dyà mamiinu adi dyenze anyi?

196 Ncintu cimwècimwè aci mu èkèleeziyà. Bàdi bateeta kusambakaja dīgumba ne Dīyi, bwà kwenza...kuteeta kufikisha Dīyi ku dyamba cìdì dīgumba dyamba. Nènku dībà dinùdì nwenza nànkù, nudi ne cyà kubìpwidijila bwanga, ne kubyengeleka, ne—ne kubàasa bitàdì byà ngòlò bwà kulwabò mu kàlaasà kàa Dyàlumingu, ne bikwàbò byônsò. Ncyà bushùwà. Pààbi, mwena Kilistò mushùwashùwale, mulediibwe cyàkàbìdì, mulediibwe ne Dīyi dyà Nzambì, yèyè's mmukayabale. S'ki wêwè awu. Twìshi ne bintu byà pa buloba kabýena bimutacisha to. Yèyè mmukankù, ùdi ubuuka upita apu. Nwamònu's, pa nànkù ùdi ùbànda mu myaba yà mu dyulu. Nwamònu anyi? Ncyà bushùwà. Cintu nànsha cimwè...

197 Mònaayi. Mpindyewu, tudi ne cyà kuumvwa cyôci aci kaaba aka, dīgumba, twìtabàayi, ne cyônsò cìdì cisakidila ku dyàmpà dyela lwevenyi aci kacyèna mwà kubwelakana ne dyàmpà dīdì kadiyi dyela lwevenyi to. Ne Bible mmudyanyile kuleeja mwab'ewu mu mushìngà, wà kubwela mu dikuukwila ne, kanwèna mwà kwangata lwevenyi munkaci mwènù to, ne Nzambì kulwàkidilaye.

198 Wêwè udi wamba ne: “Mèmè ndi Méthodiste.” Ànu mwaba awu ngùdì ufwila! “Ndi mwena Mpenta.” Udi ufwà!

199 Mèmè ndi wa Kilistò. Ncyà bushùwà. Bikèngela wêwè kwikala mwimane pa cintu kampànda. Ncyà bushùwà. Udi—udi mwimane pa cintu kampànda.

200 Churchill wàkamba musangu kampànda, mwele minu yìbìdì muulu wàmba ne: “Tudi ne bucimunyi.” Ke Angleterre kweyemenaye cyôci aci, kwitabuujabo Churchill.

201 Nènku nànsha wêwè muciitabuuje anyi to, mu dīndà emu, udi mweyemene cintu kampànda. Kùdi cintu ànu cimwèpelè cyùdì mwà kwikadilaku ne mwoyi ne kweyemenaku, ne ciine aci n'Kilistò, Dīyi. Bulelèlà!

202 Mònaayi, cintu nànsha cimwè mu Bible kacyèna cifwànyikija màngumba to pa kuumusha Baabùlòonà. Ne Baabùlòonà wàkaashiibwa kùdi Nimelòòdè, ne Nimelòòdè ùvwa muntu mupidye diitabuuja. Nènku ùvwa ne musùmbà wa bakàjì muntwamu, bàvwà ne cyà kwikala bakalenge-bakàjì bèndè, bàvwà baprófetà bakàjì. Bàdi mene beela meeji ne Baalama wa kale awu wàkafumina ku cifuku aci, bavwa beele miji ne

bikwàbò. Bavwa bakuukwila, nudi bamanye's (bààbùngi bàà kunùdi nwènù bamanyi bàà mabàla bàdi bàbalà mukàndà wà *Baabùlòònà Yìbìdì* wà Hislop, ne bikwàbò, ne bwalu-bulonda bwà èkèleeziyà), ne mwà—mwàkenzàbo. Nènku bàvwa ne bakàjì bàvwa benze ciine *eci*, ne bakàjì. . . nzambi mukàjì, ne bikwàbò byònsò, nènku civwa ntèndeleele wà bàkàmikangana ku bukolè. Bantu bònsò, mu cimenga cyònsò mu nyungulukilu wa Baabùlòònà amu bavwa benzèjìibwe ku bukolè bwà kulwa ku Baabùlòònà bwà kukuukwilabo ku kaleyì aku ku bukolèeshi bwà Nimelòdè. Nwamònu anyi? Ncyà bushùwà. Bòbò bàvwa benzèjìibwe ku bukolè bwà kucyenzabo, ku Babèlè. Ki kùdi cibwejàkàjì cìfùmine nkòkù aku.

<sup>203</sup> Nènku ki cyòci aci menemene cìdi èkèleeziyà leelù ewu: “Nwènù kanùyì babwele mu kàlaasà kàà Dyàlumingu to, wèwè kuyi mwenze *cikampànda*, ne bikèngela kukufuta bwà wèwè kwenza *cikansanga* ne kwenza *cikansanga*, ne kwenza *cikankèngà* udi pambelu pàà cimfwànyì aci.”

<sup>204</sup> Mu Tucson mwàmwa, bàdi munkaci mwà kuteeleja mu dindà emu, mvwa ànu ndikonka. . . Ntu misangu yònsò ànu ngènzeja bantu ne: “Ndaayi mu èkèleeziyà, kwònsò kuwàya aku.” Ki mèmè kumòna bantu baalukila cyànyimà mu mùshindù awu, ne baya mu nùnkù *ewu*. Ki mèmè kudyàmbidila ne: “Mbwalu kaayi abu?”

<sup>205</sup> Mèmè kuya kùdi bàmwè bàà kùdìbo: “Ditùkù dyèbè dyà kumpàla kuntwaku, bàdi bàlwa kùdi ne: ‘Shààla mwena èkèleeziyà wètù.’ Wèwè kùyì mwenze aci to, kabeenà bakwakidila to.” Nwamònu anyi? Nwamònu anyi? Ncitu cyenzeja ku bukolè, bàdi bànwenzèjaci ku bukolè, nwamònu's, nènku aci's ki Baabùlòònà. Kàdi mu Kilistò, wèwè udi ubwelamu ku disungula; kì nku bukolè to, mwoyi wèbè ngùdi ùkukòkamù.

<sup>206</sup> Nzambi dìbà adi kààkatèeka Dìnà Dyèndè mu Baabùlòònà to. Ne ntema yònsò mpindyewu. Yèyè kèna mwà kutèeka Dìnà Dyèndè mu Baabùlòònà to, maèkèleeziyà. Kaa, bòbò, *bòbò* bàdi bàtèekamù Dìnà Dyèndè, kàdi Yèyè katukù muditèekemù to. To.

<sup>207</sup> Wèwè udi wamba ne: “Èè, mpindyewu, Mwanèètù Branham!” Indila, anji indilabi tǔng, shààla wèwè ànu musòmbe mupuwe katanci kakesè. Nwandòmbu bwà mèmè kushààlaku kàbìdì ndambu. Kanwènakù mwà kumòna anyi? Mpindyewu mònaayi, *bòbò* bààkatèekamù Dìnà Dyèndè, kàdi kì n' Yèyè to.

<sup>208</sup> Mpindyewu, Yèyè mmwambà ne: “Mwaba wungàtuutakeena neenù ne kwakidila mulàmbù wènù ki wùndì Mèmè musungulè bwà kutèekamù Dìnà Dyànyì. Nwènù bwelelaayi lwà ku ciibi *eci*, ku *eci* ciibi kùndì Mèmè musungulè bwà kutèekakù Dìnà Dyànyì. Ki mwaba unùdi nulwa ngwòwò awu.”

<sup>209</sup> Èè, bòbò mbalamike ne: “Ewu ki église de Christ.” Pùkalàku cintu kampànda cìdi cyà mafi mu dīyì dyamba adi, nkupangike dīyì dīmwe dyà ne: “mufwilàkanyì.” Uh-huh, byònsò

byàkalongeshàYe abi, bàdi bàbèngangana naaBì. Bafaalèsà bàà cyena leelù.

210 Kàdi tudi ne cyà kujandula mwaba uvwaYe mutèèke Dìnà Dyèndè, bwalu mu Dyòdì ki mùdì ciibi Cyèndè cimwèpelè cilongolola. Amen! Butùmbi's wè! Tàngilààyi! Mpenyi pàdìYe mutèèke Dìnà Dyèndè? Mu Mwân'Èndè.

211 “Kaa,” mùdì wamba, “mpindyewu anji indila kakesè, Mwanèètù Branham. Awu ùvwa m'Mwânà, kî n'Taatù to.”

212 Mwânà misangu yònsò ùtu wàngata dìnà dyà tatwèndè mu bwalu bwònsò. Ndi mulwe pa buloba ebu mu dìnà dyà Branham bwalu dìnà dyà taatù wanyì ùvwa Branham.

213 Yesù wàkamba ne: “Ndi mulwe mu Dìnà dyà Taatù Wanyì, kàdi nwènù kanwena nuNgaakidila to.” Nudi baswe Mufùndù pa bwalu abu anyi? Yone Munsantu 5.43. Nwamònu anyi? “Mémè—Mémè ndi mulwè mu Dìnà dyà Taatù Wanyì, kàdi nwènù kanwèna nuNgaakidila to.” Nàнку Taatù mmutèèke Dìnà Dyèndè Yèyè mwine, dìdì “Yesù,” mu Mwânà. Ne Yèyè ki Njila, Yèyè ki Ciibi, Yèyè ki Nzùbu, Yèyè ki mwaba ùdì Nzambì musungule bwà kutèèkamù Dìnà Dyèndè. Kacya Nzambì kàtukù mutèèke Dìnà Dyèndè mu mémè to, kacya Yèyè kàtukù muDitèèke mu èkèleeziyà to, Yèyè kacya katukù muDitèèke mu ba-Méthodistes, ba-Baptistes, beena Kàtòlikè to, kàdi Yèyè wàkaDitèèka mu Kilistò, Emanuwele Mulaaba awu.

214 Ne Dìnà dìdì mu Dìyì bwalu Yèyè ùdì Dìyì. Amen! Yèyè ùdì cinyi dībà adi? Dìyì dyumvwija ndimwènèshiiḃwa dyà Dìnà dyà Nzambì. Kabyèna bikemesha to. “Ki mmusunya ne mashi bìdì bikubuulwile eci to, kàdi Taatù Wanyì udi mu Dyulu ngudi mukubuulwileci, ne Mémè ndi Nganyì. Nènku pa lubwebwe elu Nèngiibakilèpu mwaba Wanyì wà dikuukwila, ne biibi byà iferno kabyèna mwà kuMuupula to.” Amen! Éyì Èkèleeziyà udi ne mwoyi wa Nzambì, ikala mwimane kamungulu pa cishimikidi cyà Yesù Kilistò nkààayèndè. Udi mwà kwimba musambu awu, kàdi wèwè kuyi pa Kilistò Dìyì to, udi utènkakana, pa luntekà. “Kàdi pa Lubwebwe elu,” Kilistò, “Dìyì Dyànyì.”

215 Wàkiiḃaka mukenji wa ba-Luthériens kàdi bôbò kuwùvwija dīngumba. Cīvwa cyèndà cikola, citèèkedi cyà makàsà. Pashiishe Yèyè kubànda kufika ku cipidì cyà mikòlò, ba-Méthodistes, ne bikwàbò. Ki padiYe mwibakile Èkèleeziyà Wendè, pa Dìyì Dyèndè! Mpindyewu, Yèyè kèna yònsò dikàsà anyì yònsò cibelu to, Yèyè mmubidi; nènku mpindyewu ki citùpà cyà mùsongà. Nuvwaku bamòne mu bipaapu byà misàkà anyi? Kadi, mpindyewu, ncyèna nyiisha ntèndeleelelu wa cipaapu cyà musàkà to.

216 Kàdi Bible wa kumpàla ukaavwaku mufùndiḃwe, wàkafùndiḃwa mu dyulu, cidim-...[Katùpà kàà mukàbà wà mèyì munda mutupù—Muf.] Nukaavwaku bamòne aci anyi? Cìdì cibanga ne virgo, cimfwànyì cyà kumpàla mu cidiminanzaji.

Cimfwànyì cyà ndekeelu n'Leo nyama wa ntambwe. Yèyè wakalwila dyàmbedi kùdì virgo, Ùdì ulwa musangu ùdì ùlondà bu Ntambwe wa cisàmbà cyà Yudà. Kàdì ànu kumpàla kwà cyôci aci, cikondo cyà kansêrè, mushipa mucyàmàkane, bikondo byònsò bìdì bishààle abi. Bu ne tuvwakù ne dîbà dyà kubimòna; tudi naadi, ku tabernacle.

<sup>217</sup> Nènku cipaapu cyà musà-...cipaapu cyà musàkà ciikale bishimikidi abi, bwà kubanda too ne ku cibambalu cyà mfùmù. Kàdì ànu kumpàla kwà wèwè kufika ku cimanu cyà mwandamutekète, kùdì cibwelelu cikesè cyà dibaya mwaba awu, mwaba ùdì mùsànjeela upatukila bwà kakufikisha kùdì mfùmù. (Mùsànjeela, Yone Mubatiji, uvwa mufikisha, kùdì Mfùmù awu.) Kàdì Dibwe dyà mùsongà dyàkabèngiibwa. Nènku kî mbamanye to, Dibwe dyà Scone, anyi nî ncinyi cyònsò cìdidi adi, ki mbamanye ne dìdì penyì to, bwalu ndibwe dibèngiibwe. Kàdì ki dibwe dìdì dyàsa musongà wà cintu cyònsò mu kaabujimà ndyôdi adi, didi dïcìvwija cipaapu cyà musàkà munda mwà bikondo mwandamutekète byà èkèleeziyà. Sakidila ngàsà, sakidila *eci*, sakidila *eci* ne, kùdì byà kusakidila mwandamutekète, cyà ndekeelu n'Kilistò. Sakidila *eci* ku dinanga dyèbè, sakidila ngàsà, ku ngàsà webè sakidila cintu kampànda cikwàbò, ne cintu kampànda cikwàbò, too ne mudici cikafika kùdì Kilistò udi Dibwe dyà mùsongà: “Ne Mèmè ndi Ciibi.”

<sup>218</sup> Mpindyewu, mwànà wa balùme ùtu misangu yònsò ùlwa ànu mu dînà dyà tatwëndè. Mwànà wa balùme kanà yònsò ewu ùtu ùlwa mu dînà dyà tatwëndè. Ki Yesù kwamba ne: “Ndi mulwè mu Dînà dyà Taatù Wanyì.” Nànkù awu Dînà dyà Taatù nganyì? Dînà dyà Mwànà nganyì? Kadi Yèyè wàkamba ne: “Mu katanci kakesè emu bàà pa buloba kabààkuMmòna kàbìdì to, kàdì nwènù nenùMmòne.” Ùdì ùlwa mu mmwenekelu wa Nyumà Mwîmpè, Dînà adi n'Yesù. Ki bwà cinyi bàvwa munkaci mwà kukuukwila ne: “Éyi Yesù!” Nwamònu anyi? Nwamònu anyi? Taatù, Mwànà, ne Nyumà Mwîmpè: m'Mukalenge Yesù Kilistò. Kwàjikì. “Ndi mulwè mu Dînà dyà Taatù Wanyì, kàdì nwènù kanwèna nuNgaakidila to.”

<sup>219</sup> Mpindyewu, vùlukàayi ne, Yèyè wàkasakidila kàbìdì mwaba ewu ne kutùdimwija ne: “mukwàbò neàlwe,” dîngumba's, twitabàayi kampànda. “Nebàlwe mu dînà dyàbò nènku nenùbaakidile. Kanwàkungaakidila Mèmè, Dîyi dishindika ne dijaadikiibwe kumpàla kwenu to.”

<sup>220</sup> Ànu muvwaYe musangu awu mene, ki mudiYe kàbìdì leelù ewu. Aci kacinupìcikù to, nwènù bàdì mu ditùngà dijima edi aba! “Mukwàbò neàlwe, èkèleeziyà, nènku nenwitabuuje aci, bwalu kanwèna mwà kwenza munga mùshindù nànsha. Ncyàkucishindikakù to.” Yèyè kacya (nni mu cikondo kaayi, kacya) katu mwanji kushindika nànsha cimwè (mu èkèleeziyà kanà yònsò ewu) pa kuumusha Mukenji ùvwà mufidiibwe awu:

Wà Luther, dibingishiibwa; wà Wesley, dijidiibwa; wà beena Mpenta, dyalujulula dyà mapà. Pashiishe. . . Nènku padibo ànu benza dingumba ku wôwò awu, ki dyôdi kufwila ànu mwaba awu. Kenkêtaayi Mifundù.

221 Kàdi Yêyè wàkamba ne: “Mêmè nênsungulè mwaba wà kutèèka Dîna Dyànyì.” Ne Dîna adi divwa n’Yesù. Ne Yesù ùdi Dîyì, Yone Munsantu 1. Ncyà bushùwà anyì? Ki mwaba wa dikuukwila ngwôwò awu, mu Kilistò Dîyì. “Mêmè ndi mulwè mu Dîna dyà Taatù Wanyì.”

222 Mupròfetà wàkamba ne: “Dîna Dyèndè nedibîikidiibwe ne Emanùwele.” Aci m’Maataàyi 1.23, panwikala baswè kucifunda. Yesù, Yehowàh, Musùngidi awu.

223 Mpindyewu, mvensa mwi5 ùdi ùleeja ne Yêyè ki Ciibi. Too ne mpindyewu, bijaadiki bikwàbò byàbúngì bìdì kabîyi bimweneka, Ciibi eci, ne Dîna edi, ne mwaba bìdì mwà kujaadikiibwa ne kùdì mwaba ànu wùmwèpelè wùdì Nzambì ùtwilangana ne muntu bwà kukuukwila, ne mwine awu mpàdiye mu Kilistò.

224 Mpindyewu, lukonko lùdi mpindyewu ne: “Tudi tubwela munda Mwèndè munyì?” Mpindyewu, eci cidi mwà kunùtwakù bu kakèlèndè ndambu; kàdi, nudi bamanye’s, ànu mùdì dînwa dyà bwanga amu, pîikalabu kabûyi bùkuumvwijaku bibì to, kabwèna ne dikwacisha nànsha dikesè to. Nwamònu anyì?

225 Mpindyewu, ba-Luthériens bàakaswa kubwelamù mu mùshindù kampànda, mu kudivwija bàà mu èkèleeziyà wa ba-Luthériens. Ba-Méthodistes bàakajinga kubwelamù mu dyala dyà mbila. Beena Mpenta bàvwa bàakaswa kubwelamù mu dyakula dyà mu myakulu. Aci kî ncyôci ànu to! Nwamònu anyì? To, aci’s mmapà, ne bikwàbò. Kàdi Kolinto wa Kumpàla 12 ùdi wàmba ne: “Ku Nyumà umwèpelè.” Nyumà wa Nzambì, udi mwikale mufidi wa Mwoyi ku Dîyì (Dimiinu), bwà kushindika Dimiinu bwà movù awu. Nwamònu anyì?

226 Dimiinu dyà ci-Méthodiste ndyôdi edi ditèèkîibwe mwaba awu, byàkakèngèla Nyumà Mwimpè bwà kufikisha dimiinu adi ku mwoyi ne dikezuke. . . kukezula èkèleeziyà ku dijidiibwa; Luther kàakayiisha aci to, bwalu kàvwa mucimanye to. Beena Mpenta bàakaswa kwakula mu myakulu bwà dyalujulula dyà mapà. Muntu ne muntu udi wamba ne: “Ke Cyôci aci! Ke Cyôci aci!” Nwamònu anyì?

227 “Kàdi ku Nyumà ùmwèpelè nkutùdi bônso babàtiijîibwe mu Mubidi wumwe,” ne Mubidi awu ndikù, diku dyà Nzambì. Nènku ki Nzùbu wa Nzambì nyêyè awu, ne Nzùbu wa Nzambì n’Dîna dyà Yesù Kilistò. “Dîna dyà Mukalenge didi Lumbu lukolè, baakàne bàdi banyeemenaMù ne bàsanganyîibwa mu dikùbiibwa.”

228 Mpindyewu, neùbwelemù ku mwânzù kampànda anyì? Mmunyì mùdibu mwa kwakidila kabeji kèèbè kàà shekè

kòkù kamba ne: “Kafuciibwe kùdì—kùdì Révérend, Docteur, Mwambi”? Nwamònu anyi? Nwamònu anyi? Udi mufwànyine kwikala révérend, docteur, mwambi. Kadi *Dîna* dyà Mukalenge didi “Yesù Kilistò.” Nwamònu anyi?

229 “Ndi musungule bwà kutèeka Dîna Dyànyì ku ciibi cyà ku nzùbu wà diNkuukwila, bwalu famiye Wanyì neàsangilàmu mwinshi mwà Mashi; ànu mwàkadibi mu Ejiipitu amu, cintu cyònsò cìvwà pambelu cyàkafwa. Nènku mwómò amu kamwèna dyàmpà dyela lwevenyi nànsha! Kamwèna disambakaja dyà cyena mângumba nànsha mwaba ùmwè to, nzùbu Wanyì! Bânà bàànyì, balela mu mifùngù Yànyì!” Amen! Butùmbi kùdì Nzambi’s wè! “Mifùngù Yànyì yidi munda mwàbò! Ekèlekèle. . . Mémè kutèeka Dîyì Dyànyì munda mwàbò. Nèngàfundè pa mèèsà à mwoyi wàbo. Ki famiye Wanyì nyèyè awu, famiye wa Mubidi wà Yesù Kilistò; famiye awu. Nènku ku ciibi eci nkunwàbwelela, kacyi cyà ba-Méthodistes, cyà ba-Baptistes, anyi cyà beena Mpenta to, kàdi mu ciibi mùNdi mutèeke Dîna Dyànyì.” Ki m’Méthodiste to. Dîna dyà Nzambi kî m’Méthodiste to. Dîna dyà Nzambi kî Mpenta to. Dîna dyà Nzambi kî m’Baptiste to. Dîna dyà Nzambi kî n’Kàtòlikè to. Nànku awu shààlàayi pambelu pàà abi biibi. Nwamònu anyi? Nwamònu anyi? Nwamònu anyi?

230 “Kàdi mu mwaba wûNdi musungule bwà kutèekamù Dîna Dyànyì.” Mpindyewu, kakwèna mûngà mwaba mu Bible emu ùdì mufidiibwe ùkaadiku Nzambi mutèeke Dîna Dyèndè to, ànu mu Yesù Kilistò, bwalu Yèyè m’Mwânà wa Nzambi wàngàta Dîna dyà Nzambi, ne Dîna dyà buntu dyà Nzambi. “Ne kakwèna dîngà dîna difila mwinshi mwà Dyulu dîndi ne cyà kusungidiibwa ku dyòdi to.” Nànsha byòbi ne, Méthodiste, Baptiste, Presbytérien, tuteshismu, anyi cyònsò cinùdì baswè kwenza aci; ànu mu Dîna dyà Yesù Kilistò mmwikalà cinù cyònsò mwà kutwà panshi ne ludimi lwònsò mwà kujikulamù, Yèyè bu Mukalenge. Ke mùshindù unùdì nubwela ngwòwò awu.

231 Kàdi bu wèwè ànu mubatiijiibwe mu mâyì mu mùshindù mujaalame—mu bulelèlè, kàdi pashiishe uvila Dîyì, dîbà adi udi mulediibwe mu masandi; dilediibwa dyèbè kadivwa dijaalame to. Udi wamba mùvwà muMwitàbùùje cikondo aci, kàdi uMuvila.

232 Mmunyi mùndiku mufwànyine kuvila famiye wanyì? Pavwa. . . Mmunyi mùndiku mufwànyine kuvila Charles Branham bu taatù wanyì? Diteeta dyà mashi ku ciibi’s didi dicileēja. Uh-huh.

233 Cyenzedi cyànyì, ne dishindika dyà Dîyì dyà Nzambi mu nsòmbelu wanyì bìdi bileeja ne mémè ndi mwânà wa Nzambi anyi to. Mpindyewu, ki mwaba wùmwepele wà Nzambi ngwòwò awu. Nwawùmònu anyi? Mwaba wùmwepele wikalà Nzambi



mwà kwakidila mulàmbù wèbè (Nànsha wêwè ne meeji matòòke à bishi) mmu Kilistò.

<sup>234</sup> Nènku vùlukàayi...Wêwè udi wamba ne: “Èè, mèmè paanyi's mvwa mwitabuuje; s'ndi mubwele paanyi, mèmè.” Vùlukàayi ne, Bible ùdi wamba...Wêwè udi wamba ne: “Èè, Bible's mmwambe ne: ‘Ewu yònsò udi witabuuja ne Yesù Kilistò m'Mwânà wa Nzambì, mmusùngìdiibwe, neàsùngìdiibwe.’”

<sup>235</sup> Ûdi wamba nàнку, kàdi vùlukàayi ne bààkafùnda *kàbidi* ne, bààkafùnda *kàbidi* ne: “Muntu nànsha umwe kèna mwà kubìkila Yesù ne n'Kilistò to, ànu ku Nyumà Mwímpè.” Nwamònu anyi? Udi mufwànyine kwamba ne: “Ke cidiYe,” kàdi Yèyè kèna ànu mwanji kwikala cyòci aci pàdi Nyumà Mwímpè Yèyè mwine, udi ufila Mwoyi ku Dìyi awu, kàyi ùcijaadika ku dishindika dyà ne wêwè udi mwânà wa Nzambì nànsha. Ki Mufùndù ngwòwò awu.

<sup>236</sup> “Mwaba wùNdì musungùle bwà kutèekamù Dìna Dyànyì. Kwakukuukwila mu ciibi cikwàbò kanà cyònsò eci to, kàdi mu ciibi mùNdì mutèeke Dìna Dyànyì; dîbà adi Mèmè nènkwàkidilè, udi mu famiye Wanyì.”

<sup>237</sup> Mpindyewu, famiye wa Nzambì ùdi ùtùmikila dîyi dituma dyà Taatù wa famiye awu. “Ne Yèyè udi Mfùmù wa Ditalala, Nzambì Mukolè, Taatù wa kashidi; ne bukookeshi ne bumfùmù Bwèndè kabyàkwikalaku ne ndekeelu to, bukalenge nebwikalè pa makaaya Èndè.” Ne Yèyè bu Nguvena, Mfùmù, Emanuwele, Ntwàdijilu, Ndekeelu, Mfùmù wa Ditalala, Nzambì Mukolè, Taatù wa kashidi, yònsò wa ku bânà Bèndè ùdi utùmikila Dìyi dyònsò ku cikemu bwalu bàdi citùpà Cyèndè.

<sup>238</sup> Twètù tudi basòmbèle mu dîkù dyètù mùtù ba-Branhams bàsòmba. Nudi ne mwoyi mu dîkù dyènù, ba-Jones, mùtù ba-Jones bàsòmba.

<sup>239</sup> Nènku mu Nzùbu wa Nzambì tudi ne mwoyi ku Dìyi dyà Nzambì ne ku Dyònsò dîdi dipàtuùka mukana mwà Nzambì; ne ní nganyì mukwàbò yònsò, mwena mafi, katwàdyàkumuteelejakwèè. Nwamònu anyi? “Nenùdye Dyàmpà dîdi kadiyi dyela lwevenyi to, mu cikondo cyònsò cyà èkèleeziyà, ànu mùNdì nnpèèshaDi amu.” Kàdi kuteeci bwà kwalukila kàdi kwela cyòci aci mu Eci to, bwalu ncikabwele mu cicolakola. “Nenwàngatè mifùbà ne byònsò biikalè bishààle ku mulàmbù awu ne kubyòshà!” Kujikè, aci cikondo cyà èkèleeziyà cikaadi cifwè, tudi batùngunuke; tukàadi mu cikwàbò mpindyewu. Amen!

<sup>240</sup> “Mwaba wùndì *Mèmè* musungule bwà kutèekamù Dìna Dyànyì.” Kaa, èkèlekèlè! Kolinto wa Kumpàla 12.

<sup>241</sup> Mònaayi, Efèsò 4.30.

...*kanubungamiji Nyumà Mwîmpè wa Nzambi to, kunwàkatwìbwà citampì too ne ku...* (ditabuluja didi dilondà anyi?)... too ne ku *ditùkù dyà bupikudi bwènù.*

...*kanubungamiji Nyumà Mwîmpè wa Nzambi, unwàkatwìbwà nendè citampì too ne ku ditùkù dyà bupikudi bwènù.*

<sup>242</sup> Mpindyewu mònaayi. Twǎnjǎàyi kwangata aci bwà kuciteeka ku dileesòna dyètù dyà Mifùndù. Dìbà adi's mbîmpè twètù kuya; ngeela meeji ne ndi ncyòkesha bantu's. Nwamònu anyi? [Muntu kampànda ùdi wamba ne: "To, kwèna utùcyòkesha to, Mwanèètù Branham."—Muf.] Tàngilǎàyi kuneeku, bantu benda bajuuka kuulu bààlukila mu mààbò, nudi numòna's, pa nàнку bàdi ne—bàdi ne cyà kulamba cyàkudyà cyà mundaamuunya, ne muntu kampànda udibò bajinga kutwilangana nendè. Kabàvwa bindile bwà kulwa mwab'ewu bwà kuteeleja ditùkù dijimà to. Nwamònu anyi? Kàdi, tàngilǎàyi, nudi bamanye...

<sup>243</sup> [Mwanèètù Ben Bryant ùvwa wamba cintu kampànda—Muf.] Ben, kaa, s'bivwa bikèngela mèmè kwenza neebè cintu kampànda! Àkubènèshe! Twasàkidila, Mwanèètù Ben. Ndi mukunange, Mwanèètù Ben.

<sup>244</sup> Bu nwènù mwà kumanya mùvwà mwànà wa balùme awu mukenge bwètù twètù mu mvità ayi; mmùsùnsula kùdi màzaji, bintu bimutaayikile ne bikwàbò byònsò. Yèyè mmumòne mabika ne mala, kàdi Nzambi mmumubeneshe. Yèyè wàkashààla ne lulamatu. Mukàjèndè kumushiyaye, kunyeemaye e kuya kasèdiibwa cyàkàbìdi, e kwangatayè bânà bèndè. Kaa, ekèlekèle, ncyèna ànu mwà kukwèlela meeji to.

<sup>245</sup> Kàdi, nànsha nàнку, Nzambi àkubènèshè, Ben.

<sup>246</sup> Nyèwu musòmbè mwaba awu mpindyewu ne bisùnsukila byà byamù mu mubidi mujima, bìmubònda mijilu ne bikwàbò byònsò. S'bìdi ne, bìdi bikèngela bwà wèwè kumanya mwàkabangà maalu, nudi numòna's. Nzambi abèneshè mwànà wa balùme awu. Èyowà.

...*unùdi nwènù batwìbwe nendè citampì too ne ku ditùkù dyà bupikudi bwènù.*

<sup>247</sup> Mònaayi! Mpindyewu, eci ncifwànyine kunònya kakesè, kàdi mònaayi. Kanwikadi nwamfikila munda to. Vùlukààyi ànu's.

<sup>248</sup> Pàvwà Izaleela ànu ne wàtangidi ku ciibi aci, ne mashi awu ku ciibi, dìnà (mashi, mwoyi), ne wàbwedi mwìnshì mwà mashi awu, kabààkapàtukaku kàbìdi to too ne pààkapàtukabo mu Ejiipitu.

...*kanubungamiji Nyumà Mwîmpè wa Nzambi to, kunùdi nubwelamu ne kanuyi kàbìdi nupatukamu to too ne ku ditùkù dinùdi nupikudiibwa nupàtuka.* (Nwamònu anyi?)

249 Nudi bamanye's, Bible utu misangu yônsò ànu mubinge. Yêyè ùdi utèèkemù Mèyi, nudi ne cyà kuÀtèèka mwaba ùdiWu aya, bwà kuÀvwija, kuvwija cimfwànyì cyônsò nkòòng cyà bupikudi. Nwamònu anyi? Nwamònu anyi?

*...kanùbungamiji Nyumà Mwîmpè wa Nzambì to, unùdi batwibwe nendè citampì too ne ku bupikudi bwènù. (Too ne panwàpikudiibwa.)*

250 Udi mutwibwemù citampì, udi mwinshì mwà Mashi. Kwèna upatuka kàbidì to. Nènku díbà adi udi cinyi? Mwànà wa Nzambì mu famiye wa Nzambì, mutwàmu citampì kùdì Nyumà Mwîmpè. Dyabulu kî mmufwànyineku kukupeta to nànsha yêyè mwenzèjìibwa bwà kukupeta; bwalu wèwè udi mufwè, citùpà cyà bàyeebè wa kale awu ncifwè; ne udi mujiikìibwe, ne mwoyi wèbè mmusokoka mu Nzambì kupicila ku Kilistò, ne mutwibwe citampì kùdì Nyumà Mwîmpè. Nwamònu anyi? Mmuni mwàkupetaye? Newùpatuke bishì? Wèwè udi muntwamu! Butumbi's wè! Mpindyewu nèndekelè aci nànkù; bìdì ànu bikùmbàne ndambu bwà nwènù kumanya cìndì munkaci mwà kwamba.

251 Pashìishe bufùki bupyabùpyà, kabìyi bwà dingumba kampànda to kàdì ànu bwà Dìyì. Wèwè udi bufùki bwà Dìyì. Bwalu dibwe dyà cishimikidi dyàkàtèèkiibwa mu wèwè kumpàla kwà difùkà dyà dyulu ne buloba, badyànjlila kulongolola bwà kwikala bàna bàà balùme ne bàà bakàjì bàà Nzambì.

252 Ne pa dyòdì edi padi pàlwa dibwe ditentame pa dikwàbò, mu cikondo ne cikondo cyônsò, bwà kushindika Dìyì dìdì dipàtuka adi, ànu menemene mwàkenza Yesù mu cikondo Cyèndè, cìdì ciikàle Dibwe dyà mùsongà dyàbì byônsò. Munda Mwèndè mùvwa mutèkìibwe cikondo ne cikondo cyônsò. Mu Yesù mùvwa Mòsà. Mu Yesù mùvwa Davìdì. Mu Yesù mùvwa bapròfetà. Ncyà bushùwà anyi? Tàngilààyì Yòzefù, musùmbishìibwe ku binjanja byà mfranga bitwè ku makumi asatu, mwediibwe mu ciina, baciinka ne mmufwè, wàkapàtùdiibwamù, kuyayè katèèkiibwa ku dyàbalùme dyà Pàlò. Tàngilààyì, menemene, Yesù ùvwa... Yòzefù ùvwa mu Yesù.

253 Nènku pààkalwàYe, Yêyè ùvwa kaabujimà kàà bamfùmù, bapròfetà (àlèluuyàh), Bunzambì mu ngiikadilu wa mubidi bùvwa busòmbele munda Mwèndè. Wàkalwa bwà kupikulamù Mukàjì-musèla, Mudimu mwowela byanza. Mudimu mwowela byanza ùdì wàmabila Sàtaanà ne...

254 Pàdiye wàmba ne: "Matùkù a bishimà akaadi mamane kupìta. Kàkùtu cintu cyà bwena bintu binùdì nwamba abi to."

255 "Nkatùkilaanyì apa, Sàtaanà." Nwamònu anyi? Nwamònu's, Mudimu mwowela byanza mwimane kàbidì munkaci mwà kukùba.

256 Musangu kampànda Dibwe dyà mùsongà nedyàlukile, Mutù wa byônsò abi, ne neàkidile Mukàjì-musèla kudiye Yêyè

mwine; bwalu's mukàji wàkangaciibwa ku mulùme, ncitùpà cyà mulùme. Byònsò. . . Mifungù yà mulùme yidi mu mukàji, ke cidi cyenza mukàji. Nènkù mùshindù awu ke ùdi Dîyî dyà Nzambì mu Èkèleeziyà, ke cidi civwija Èkèleeziyà Mukàji-musèla's. Ki ndingumba to, aci ncyà dyabulu, dyònsò dyà kùdiwu. Ncyèna ngamba aci bwà bantu bàdimu abu to; mbantu bakwàte ne byà luse badingiibwe, bu mwàkambà Yesù ne: "Bampofo balombola bampofo." Nènkù Yèyè kàvwa mwà kubàbiikila bwà kupàtukabò to.

257 Ki bôbò kwamba ne: "Mòna's, udi mulediibwe mu masandi! Udi ukwambila ne nebàlwe kùdi nganyì? Mmu cilongelu kaayi, nseminère kaayi wakakujingulula?" Bôbò ne: "Tudi ne Mòsà. Tudi bamanye. . ."

258 Yèyè ne: "Bu ne nuvwa bamanye Mòsà, nùnkù's nudi baMmanyè Mémè."

259 Bwalu Mòsà wàkaMufùnda mu mikàndà yèndè yinaayi ne: "Mukalenge Nzambì wenù neàjuule Mufidi wa Dîyî, anyì, Mupròfetà, mufwànàngane naanyì, ne wabenga kuteeleja Mupròfetà awu neùmushiibwe munkaci mwà bantu." Ki cyònsò cidiku ncyòci aci. Ne Yèyè ùdi cinyì? Dîyî. Nènkù ncinyì Aci? Kanùshiyi lwevenyi nànsha lukese lùdi lushààle mu. . . wenù. . . kanùteekiMù lwevenyi nànsha lukese to. Kunùsakididi twitabàayi kampànda to, òngumba nànsha òmwe, bwalu bikaadi binyanguke ànu mwaba awu, mulàmbù wèbè wàjiki.

260 Tùlwijakajàayi mpindyewu, ne lukasa lwònsò, bwà nwamòna mwà kuya kadyà.

261 Mònaayi! Mpindyewu, dîbà adi, wèwè udi mwànà wa Nzambì, mu nzùbu wa Nzambì, udi citùpà cyà cibucilu cyà Nzambì. Loomo 8.1 ne: "Nànkù kakwèna dipiila nànsha òmwe bwà aba bàdi mu Kilistò Yesù to." Bwalu mbafwè ku maalu àa pa buloba, biikale ne mwoyi munda Mwèndè, ne biikale ne mwoyi mu ditùkù dyà mpindyewu edi, bàvwija Dîyî didi Nzambì mubenze naadi adi, anyì mudyànjiile kubalongolwela, mufunde dîna dyàbò mu Mukàndà wa Mukàji-musèla ewu. Nènkù pàdi Màyi àlwa pa diminu didi mu mwoyi adi, didikolesha too ne ku Mukàji-musèla wa Kilistò. Kaa, ekèlekèle! Bipwàngàne bipange ne mwà kupwàngàna. Mu cikondo ne cikondo cyònsò bitu ànu mùshindù awu.

262 Ba-Luthériens, mu dibingishiibwa, makàsà, bàakacibandisha mùshindù awu; Wesley, mu dijidiibwa. Beena Mpenta mu mabòko, midimu ne byenzedi ne bikwàbò, byàkakèngela bwà kwikalabò ba-Calvinistes. . . anyì byàkakèngela bwà kwikalabò ba-Arminiens, byàkakèngela biikale beena ne ànu mikenji. Kàdi mpindyewu tudi tulwa ku Mutù, Dibwe dyà mùsongà. "Ngàsà! Ngàsà!" Dibwe dyà mùsongà didi dyela lubila.

<sup>263</sup> Dibwe dyà mùsongà didi dyela lubila kaayi? “Ngàsà! Ngàsà!” Buumuke ku lufù ne ku twitabàayi, babwele mu Díyi didi ne mwoyi dyà Nzambì udi ne mwoyi. Ndongamu wùmwèpelè udi Nzambì mulongolole bwà cikondo Cyèndè, Bèndè bānà mu cikondo cyà Díyi mbafuùlùlùdiibwe kùdi Nyumà byenze bu kantòlantòla kàdi katèemeshiibwe katùuka ku cintu kampànda bwà kuciwija ne mwoyi; ne basòmbè mpindyewu mu myaba yà mu Dyulu (mu dībà dyà mpindyewu), bamane kwikala ne mwoyi ne tukòokela ku mulayi wònsò mu Díyi. Dībà adi aci cidi cyenza cinyi? Wèwè mwikāle citùpà cyà mifùngù yà Nzambì, citùpà cyà Díyi, bantu bakwàbò citùpà cyà Díyi dyà Nzambì, basòmbèlè pāmwe, bāmwenesha Mubidi wònsò mujimà wà Kilistò, bwalu kakwèna lwevenyi nānsa lukesè munkaci mwènù to. (Nudi numòna cidiYe munkaci mwà kwamba aci anyi, Mwanèètù Brown?) Kakwikadi lwevenyi nānsa lukesè munkaci mwènù to, ànu Díyi nkàāyaadi, basòmbèlè mu myaba yà mu Dyulu, mu ciibi mudiYe mutèèke Dīnà Dyèndè: Kilistò Yesu.

<sup>264</sup> Kakūyi lwevenyi nānsa lukesè munkaci mwènù to, ke cidi citwāla kaabujimà kàa bunzambì mu mubidi munkaci mwènù. Kavwa mwà kucyènzà mu cikondo cyà Luther to, kavwa mwà kucyènzà mu cikondo cyà Wesley to, kavwa mwà kucyènzà mu cikondo cyà beena Mpenta to; kàdi mu ditùkù diikala Mwānà wa muntu mwà kumwènèshiibwa, kubuuludiibwa, kwaluja Èkèleeziyà pāmwe ne Bunzambì bwà Nzambì bwònsò mu kaabujimà munkaci mwà bantu Bèndè, uleeja bimanyinu bimwèbimwè bìvwà bimwènèka ne mèsù abi, uDimwenesha Yèyè mwine bu mwākenzāYe ku cibangidilu pāakamwèneshiibwaYe pa buloba mu mmwènèkelu wa Nzambì-Mupròfetà. Kaa! Butùmbi’s wè! Mulaya kùdi Maalàki 4, mulaya kùdi mikwàbò Mifùndù yònsò ayi. Nudi nukuukwila penyì? Nžùbu wa Nzambì, basòmbè (mu dībà dyà mpindyewu).

<sup>265</sup> Mpindyewu, lukasa, twānjì tutàngilāayi ne lukasa lwònsò mpindyewu, ne pashìishe tütungùnukè ne . . . Mu tusunsa dikumi netwikale bayè, bu Mukalenge mwà kwanyisha.

<sup>266</sup> Mpindyewu tütàngilāayi bāmwe bàvwà bafuùlùlùdiibwe mu nzùbu wa Nzambì ewu, bàà mu cikondo cyàbò.

<sup>267</sup> Enoka! (Mu tusunsa dikumi netùye, bu nwènù mwà kutwàlakù ànu ntanta bule nānku cyanānà.) Tàngilāayi, Enoka ùvwa Díyi didi ne mwoyi dyà Nzambì dyà cikondo cyèndè, yèyè uvwa mupròfetà.

<sup>268</sup> Mupròfetà ke udi lumwènù lùdi luleeja Nzambì. Mbanganyì bàdi bamanye aci? Lu—lumwènù kalùtu ludileeja lwòlò lwine to, lu—lumwènù kī ncintu cidi cimwenekela mu lumwènù to. Kudi ne cyà kwikala cintu cidi ne cyà kutuuta mu lumwènù—bwà lumwènù kucilejalù. Pa nānku mupròfetà ndibùngù disungula dyà Nzambì didi kadiyi mwà kuleeja cintu nānsa cīmwe to kàdi yèyè ùdi mu njila wa buludi ne cintu cidi cimwenekela

mu lumwènù aci, Nzambì, bwà kuleeja cimfwànyì cyà Kilistò, Dîyì. Nwamònu's, cintu cikwàbò nànsha cimwè kacýèna mwà kucýènzakù to. Wèwè udi lumwènù, ke bwà cinyì bìvwà bikèngela bwà mupròfetà kudyàye mukàndà awu. Ki bwà cinyì byàkakèngela bwà yèyè kudya mukàndà muvùngà. Ùvwa ne cyà kuleeja Dîyì adi bwà cikondo aci. Nwacyũmvù anyì?

<sup>269</sup> Mònaayi Enoke, lumwènù lupwàngàne lwà Nzambì mu cifwànyikijilu. Pavwa Nzambì mujikije—mujikije nèndè, Wàkamwambula ànu cyanàànaà, wàkamwangata muulu. Byamù bilamakaja bìvwàye muleeje abi mbyàkashààlà bukolè bwenzeji ne Nyumà, ne kumwambulabu muulu.

<sup>270</sup> Byà mwomùmwe mu matùkù a Eliyà. Eliyà, nànsha ku mifùbà yendè, mùvwà cimfwànyì aci. . . Lumwènù lwà Nzambì mu mubidi wèndè mwikàle mumwènèshùbwe Dîyì dyà Nzambì. Bààkatèèkapù muntu mufwè, kadi yèyè awu wàkaalukila cyàkàbìdi ku mwoyi. Tudi mubidi ne mufùbà Yèndè, bu mudibi ne twètù tudi Mukàjì-musèla wa Kilistò. Nudi nwitabuuja aci anyì? Èyo. Yèyè wàkatùfwila, ne twètù tudi bafwè ku twètù biine ne tudi bajiiikùbwe mu Dìna Dyèndè, bwà katwikadi “kàbìdi bàà pa buloba to, kàdi munda Mwèndè,” mwena munda mùdi famiye mujimà wa mu Dyulu mwinyikiibwe dìnà dyà Yesù Kilistò. Ki Efeso 1.21 nyawu. Bwalu Dyulu dijimà. . . famiye wa mu Dyulu. Famiye wa mu Dyulu mmwinyika nganyi? Yesù. Famiye wa pa buloba mmwinyika dìnà kaayi? Èè, awu's nanzùbu wa Nzambì mwaba ùdì Mashì asanganyibwa awu. Mmwómò anyì? Ki ciibi ncyòci aci, ki mushikù wa mbelu ngòwò awu, ki mwaba wùdìYe mutèèke Dìna Dyèndè, ne Dîyì dyàkavwijiibwa mubidi ne dyàkasòmbela munkaci mwètù. N'Dîyì diikale didileeja ne diteemesha cikondo cinùdi ne mwoyi aci. Ki ciwvaYe ncyòci aci, ki ciwvà Mòsà ncyòci aci, ki ciwvà Yakòbò aci's, ki ciwvà bakwàbò bònsò abo aci's, kuteemesha Dîyì dyà Nzambì adi, lumwènù lùvwà Nzambì uDileejila alu's. Ne kufika ku cimfwànyì cipwàngàne cyà Nzambì aci, Yesù Kilistò, Mudimu mwowela byanza wà Nzambì awu, Wàkatuciibwa bwà Wàmòna mwà kwangata bakwàbò bwònsò bu Mukàjì-musèla bàvwà mmwènu abu.

<sup>271</sup> Mòsà ùvwa munda Mwèndè. Yoshùwà ùvwa munda Mwèndè. Nènkù pawikala munda Mwèndè, uvwa munda Mwèndè kumpàla kwà difuka dyà dyulu ne buloba, famiye wa Nzambì; wèwè wàkakènga Nèndè, wàkafwà Nèndè, wàkaya Nèndè ku nkuruse, wàkabika Nèndè ku lufù; nènkù mpindyewu ùcidi ànu Nèndè, musòmbè mu myaba yà mu Dyulu, mwikale uleeja Mukenji wa cikondo kùdi bàà pa buloba, Bukènkè bwà bàà pa buloba. “Nudi Bukènkè bwà bàà pa buloba,” kadi piikalàBu busokoka kùdi citungà cyà cyena màngumba, nebàBùmònè bishi's? Bwà bilèlè byènù, nudi nuvwija Bukènkè kabùyì ne bukolè nànsha! Mu kuteeta. . . Nwènù beana màngumba, mu kuteeta kulama Bukènkè kule ne èkèleeziyà wenù;

kanwàkubwelamù to, anyì kanwàkubàlekela bàbwelamù to. Amen.

<sup>272</sup> Twǎnjì twimanààyì ànu cyanàànà. Ekèlekèlè, ndi ne byàbúngì be mwab'ewu. Tudi—tudi bafwànyine kutùngùnuka... Kaa, ekèlekèlè! Tudi ne tusunsa tutaanu.

<sup>273</sup> Nudi numòna ne Ciibi nganyi? Nzambi wàkateeka Dìna Dyèndè penyi? Mu Yesù. Udi ubwela mu Dìna Dyèndè bìshi's? Udi ubwelamù bìshi? Mu kubatiijibwamu! Munyi? Ku màyi anyi? Ku Nyumà! “Mukalenge umwepelè, diitabuuja òmwèpelè, dibatiiza òmwèpelè.” Adi ndibatiiza dyà Nyumà Mwímpe.

<sup>274</sup> Dibatiiza dyà mu màyi didi dikubweja ànu mu bwobùmwe ne cisàmbà, bwà ne wèwè udi mujingulule ne udi mwitabe Kilistò. Aci m'Bulelèlè. Kàdi cilumbu ncyà dibatiiza dyà Nyumà. Ndi mwà kusòka Dìna dyà Yesù pa wèwè bwà kùkubàtiiza, aci kaciyèna cyènza nànkù to.

<sup>275</sup> Kàdi pàdì ànu Nyumà Mwímpe awu bulelèlè... Dìyi dilelèlè dibwela munda mwèbè (Dìyi, Yesù), apu, mwanèètù, Mukenji kì mmusokome bwèbè wèwè dībà adì to; udi muWùmanyè, mwanèètù wa balume, Wònsò mmutòòkesha bìmpè kumpàla kwèbè. Àlèluuyàh! Butùmbi bwìkale kùdì Nzambi! Amen!

Ndi muMunange, ndi muMunange  
Bwalu Yèyè wakannanga kumpàla  
Ne wàkampetela lupàndù...

Nzambi munanga, ndi ndomba bwà Wèwè kwondopaku bantu aba, Mukalenge, ne kusangaja muntu ne muntu wa kudibo. Mu Dìna dyà Yesù Kilistò. Amen.

<sup>276</sup> Kaa! Dinanga! Kaa!

Kubangila ànu piine apu, ku diitabuuja mèmè kumòna musùlu awu  
Ùdì mputà yèbè yidì ituuta nkòkà mipàtùlè,  
(Byumukila kùdì Mudimu mwowela byanza awu.)  
Dinanga didi dipikula ke dikaadi cyànyì cyena bwalu,

<sup>277</sup> Mmuni mùdì mwà...? Nzambi ùdì Dinanga. “Ewu udi unanga ngwa Nzambi,” dinanga dyà Nzambi, dyà cijila, kadiyi dinanga dyà bukooya to; ditòòke, dikezuke, dinanga dyà cijila, dinanga dyà Nzambi Dìyi. “Ndi musokoke Mikenji Yèbè munda mwà mwoyi wanyi, bwà ne ncikwenzèdì mpèkaatù to,” kaa, ekèlekèlè, awu n'Davidì wela lubila. Yèyè kì mmulenga wa dikema anyi? Kanwènakù baMunange anyi?

<sup>278</sup> Mpindyewu, kudi Njila, Njila mukezuke, wa cijila, mwaba wùmwèpelè wa ditwilanganà wikalà Nzambi ne cyà kutwilàngana nèènù. Kabiya ne mbwalu udi wamba ne: “Nzambi, mpindyewu, mèmè ndi Méthodiste mwímpe. Mèmè ndi Baptiste mwímpe. Mèmè ndi mwena Mpenta mwímpe to.”

To! Bwalu wêwè udi mu Yesù Dîyì, citùpà cyà Dîyì cìdì munkaci mwà kumwènèshiibwa leelù ewu eci, Mukenji wà ditùkù *edi* awu's; kawùyi wà Luther to, wà Wesley, wà beena Mpenta; kàdì Yesù webà, mundidìmbi, ùdì mulwe mu cyòcì *eci*. Kwèna mwà kwalukila ku *aci* to, aci nkusakidila lwevenyi ku Dyâmpà dyèbè dyà cijila, ne: "Muntu neikale ne mwoyi ku Dîyì dyònsò didì dipátuka mukana mwà Nzambì, mu muvù Wàdì."

<sup>279</sup> Éyì lwàku's, Mukalenge Yesù, Dibwe dyà mùsongà dinène adi. Tàngilààyi mùdilu lulààle kwàka, lupwishi lwà ba-Luthériens bàakafwilà diitabuuja kuntu kwàka abu; tàngilààyi ba-Méthodistes abu.

<sup>280</sup> Beena Mpenta abu ne bakwàbò, balwa mpindyewu, cisà cilelèlè cìdì cipatuke aci.

<sup>281</sup> Nwènu beena Assemblées de Dieu nuwà baye kadivwija bulongolodi, pààbu cintu ciine cìdì Nzambì munùpàtùlemù aci, nwènu kwalukilamù buludì ànu mùdì ngulube mwalùkile mu bitoci byèndè.

<sup>282</sup> Nwènu ba-Unitaires, Basanga, ba-J.C. bàà kale bàà... Assemblées pentecôtiste de Jésus Christ. Umwe bwà bantu bafiike, ne nwènu kutàpùluka bwà disungulujangana dyà makòbà. Nwènu bàkenza cyòcì aci, ne pashìishe nwènu kudisanga nwènu biine kàdì kucibùkila ne: "Basanga." Ki pashìishe kudìvwijabò bulongolodi, ne kukòkanganabò ne ma-Assemblées: "Ànu mùdì mbwa walukila ku bilushi byèndè amu." Pìikalà bilushi byàkasaamisha mbwa musangu wà kumpàla, kabyèna mwà kumusaamisha kàbìdì anyì? Shintulula ndilu wèbè umuke ku dīgumba dyèbè aku uye ku Dîyì, kàdì wikale ne mwoyi pàmwè ne Kilistò. Bundu bwènu!

Ndi ne Taatù dyàmwàmwa,  
Ndi ne Taatù dyàmwàmwa,  
Ndi ne Taatù dyàmwàmwa,  
Dìshiyà dyàmwàmwa.

Dìngà ditùkù dya dìbàlakana nênye  
kaMumòna,  
Dìngà ditùkù dyà dìbàlakana...nye  
kaMumòna,  
Dìngà ditùkù dyà dìbàlakana nênye  
kaMumòna,  
Dìshiyà dyàmwàmwa.

Kaa, aci's neciikalè disangila dyà disànkà's!  
Aci kacya...(Dîyì didì diya ku Dîyì!)...  
disangila!  
(Pààbàndà Mukàjì-musèla, Dîyì ku Dîyì.)...  
disangila dyà disànkà's!  
Dìshiyà dyàmwàmwa.



Kaa, diine ditùkù dyà dibàlakana adi's didi  
mwà kwikala mààlabà,  
Diine ditùkù dyà dibàlakana adi's didi mwà  
kwikala mààlabà,  
Diine ditùkù dyà dibàlakana adi's didi mwà  
kwikala mààlabà,  
Dìshiyà dyàmwàmwa.

283 Wèwè udi wamba ne: “Udi wambilamù anyi, Mwanèètù Branham?”

284 Èyowà's, mukalenge! Pìikalà ba-Luthériens bàà cikondo aci, baa Wesley bàà cikondo cyàbò, beena mpenta bàà cikondo cyàbò (bantu balelèlà abu, kabàyi beena màngumba to); beena Mpenta, aba mene bààkasàkidila lwevenyi (dingumba dyàbò adi), bààkafwà. Kàdi Dìyi dilelèlà edi didi ditungunuka, nwamònu's. Ànu mwàkambà Yesù ne: “Mu ditùkù adi, nenùmanyè ne Mémè ndi munda mwà Taatù ne Taatù ùdi munda Mwànyì, ne Mémè munda mwènù ne nwènù munda Mwànyì.” Ndìyi dyònsò!

Kaa, aci's neciikalè disangila dyà disànkà's!  
(Pàadisangà bàà Bèndè ku ciibi Cyèndè.)  
... disangila dyà disànkà's!  
Aci's neciikalè disangila dyà disànkà's!  
Dìshiyà dyàmwàmwa.

285 Mpindyewu, èkèleeziyà, tudi tulongesha mpindyewu. Kàdi, vùlukàayi ne, paùdi umuka apa, banga kupatuka mu cizubu mpindyewu; ukaadi ubwela mu lutete, kàdi shààla mu Bwikadi bwà Mwànà. Kanùsàkididi to, cìndi mwambe aci; kanumushidi to, cìndi mwambe aci. Bwalu, ndi ngàmbe Bulelèlà ànu mùndi muBùmanyè, mùdi Taatù mubùmpèèshe. Nwamònu anyi? KanùsàkididiKù to, ambayi ànu cingàmbe aci.

286 Bwalu budi ne, ambilaayi ànu bantu bwà kulwabò kukeba Mukalenge Yesù. Ne dībà adi shààlaayi nwènù biine mu Bwikadi Bwèndè, Munangaayi ànu kuMunanga's, “Èyi Mukalenge Yesù, Mwànà wa Nzambì, ndi muKunange. Pòlobejà mwoyi wànyì, Mukalenge. Umushaku bukooya bwònsò ne dinanga dyà byà pa buloba, nènku ndekeleku ngiikale ne nsòmbelu wa cijila pa buloba ebu kumpàla Kwèbè.”

287 Twinyikààyaaku mitù yètù bwà disambila. Mpindyewu, twànji tumonebi, tudi ne muntu udi musungudiibwe bwà kututangalaja mu disambila anyi? Anyi, mmémè mwine, pa dībà adi's. Ikalaayi ne kaneemu kàà menemene.

288 Nzambì munanga, tudi tuKusakidila bwalu tudi bapete cyàkudyà cyètù cyà nyumà. Tudi tuKwela twasàkidila, Mukalenge, bwalu vitamines wa Dìyi udi ukolesha bàà bàà Nzambì. Kacyèna ne bwenzeji pa musumbà mukwàbò wa mùshindù kanà wònsò to, ànu pa bàà bàà balùme ne bàà bakàji bàà Nzambì. Pa nànkù tudi tuKwela twasàkidila bwà Cyôci eci. Nènku tudi tulòmba, Nzambì, bwà twètù kubwelela mwómò

amu, bwà katùKusakididi ànu cyaààà to. Tudi tuKwela twasàkidila bwà Cyôci eci, kàdi swàku tukwate mudimu ne dikàndà bwà kuteeta (ku Dinanga) kuswishisha bantu bwà kwitabuujabò Nzambi wetù; bantòmbòji, bangènzàmpèèkààtù, bakàji, balùme, bansongàalùmè, bansongàakàji, mu cikondo eci.

<sup>289</sup> Pa kumòna, Mukalenge, ne ngiikadilu ya mitù, cikondo cyà dibìnduluka cìdi bantu basòmbèlemu eci, cìdi cibàpàtula mu lungènyì lwàbò; ànu bwà kuuja menemene cìvwà Mifùndù myàmbe ne milayè aci, bintu binène bìdi byenza bwôwà bìvwà mwà kulwa pa buloba; bu mùdi mpasu yà mikùmbi, bwà kulumbatanga ne bakàji bàdi bakosa nsukì yàbò, neyikalè ne nsukì mile bu yà bakàji. Ne bintu bishìilèshìilàngàne byà byenza bwôwà bìikalabò mwà kumòna, Mukalenge, mu mitù amu, mu ngiikadilu udi ushima udibò basanganyibwamù awu, ne pashìishe bèèla mbilà mikolè bwà mabwe ne mikùnà. Bakàji bàdi bajinga kukolesha mbwa ne tumpuusu, kabàyi bakolesha bânà bwà kuKutwà musinga to. Aba baWàkapà bânà ne bàakabiimità, kubàlekelela mu misèèsù bwà kwenzabò mùdìbo baswè amu. Kabyèna bikèmesha to muWàkamba, Mukalenge, paŬwà uya ku nkuruse apu ne: “Pashìishe nebàbange kwela mbila bwà mbwebwe ne mikuna kubàpònenayi.”

<sup>290</sup> Tudi tumòna bintu bikwàbò byònsò munkaci mwà kubànda buludi too ne pa dîbà edi. Tudi tumòna ne Mifùndù munkaci mwà kushindikiibwa, kujaadikiibwa. Nènku ànu mutùdi tumòna Cyôci aci, Mukalenge, Wèwè, ne mèsù ètù twètù biine, mwikale mumwènèshìibwe, dîngà ditùkù nekwikale Dyambwibwa nènku netùmòne dimweneshiibwa dyà Dìyi adi, “Bwalu Mwànà wa muntu nealwe mu mavuba a butùmbi, ne Banjelo Bèndè bàà cijila poopàmwe Nèndè, nènku netwàngàciibwe muulu bwà kutuutakeena Nèndè mu lupeepèlè.” Mpa dîbà adi piikala...Tudi tucyùmvwà mpindiyewu, dîbà adi netùcìmonè ne mèsù ètù twètù biine.

<sup>291</sup> Swaku bwà twàsanganyibwakù munda Mwèndè, Mukalenge, mwaba wùmwepele mulongolola. Ne Yèyè ki Mulàmbù mwine. Tudi tuMutwadila, citùdi buumvwè bàmba aci, Yesù Kilistò, mu nzùbu wa Nzambi ku dibàtiiza dyà Nyumà Mwimpè, mu Dîna dyà Yesù Kilistò. Nènku mwòmò amu ke mùdi Mulàmbù wètù mwanyishìibwe ne tudì babwejiibwe mu famiye; bwalu, baciikale bapàmbùke pa buloba, tuvwa balongolodiibwe bu bânà bàà balùme ne bàà bakàji bàà Nzambi kumpàla kwà difùka dyà dyulu ne buloba. Twasàkidila bwà cyôci aci, Taatù. Kaa, mmunyi mùdi muntu mufwànyineku kubenga cintu cyà bwena aci, pàakasanganabò Bulelèlè, bwà ne Nzambi wàkabàsobola kubàpàtula mu maalu à pa buloba? Kuvwa miliyò mijimine, mu ditùkù dîmvwà musungidiibwe adi.

<sup>292</sup> Éyi Mwànà wa mùkòòkò udi upùnga ne lufù, mmunyi mùndi mwà kuKwela's twasàkidila? Mmunyi mùdi mwoyi wanyi mwà kwikala ne kaneemu kakùmbàne kumpàla Kwèbè?

Nkwàcishèku, Nzambi munanga, bwà kwikala ne nsòmbelu wa lulamatu. Kwacishaku bantu bàànyì bwà kwikalabò ne nsòmbelu wa lulamatu. Ndi mbalombela, Mukalenge, muntu ne muntu, bwa Wèwè kucyenza, Nzambi, mu mùshindù kampànda, ncyèna...Ncyèna mufwànyine kumanya ne mmùshindù kaayi...Ncyèna mumanye ne mmùshindù kaayi to, ànu mùshindù mwine wa kulòmba's, Mukalenge; ne pàmwăpa ncyèna mene ndomba cyôcì aci mu mùshindù mujaalame to. Kàdi Wèwè fwàku luse ku dipanga dyànyì, Mukalenge, ne utàngila ànu mwoyi wànyì. Ndi ndomba bwà nànsha umwe wa kùdìbo kàjiminnyiku to, nànsha umwe wa kùdìbo, Taatù. Ndi mbànana, muntu ne muntu, bwèbè Wèwè. Mu Dîna dyà Yesù Kilistò. Amen.

Ndi muMunange, ndi . . .

Ne nwênù baMunange, nudi nunangangana muntu ne mukwèndè. Labulàngànaayi ku cyanza.



*MWABA ÛMWÈPELÈ WÀ DIKUUKWILA ÛDÌ NZAMBÌ MUFÌLE* LUA65-1128M  
(God's Only Provided Place Of Worship)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dindà, mu matùkù 28 à ngondo wa kaswàbàngà, cidimu cyà 1965, ku Life Tabernacle mu Shreveport, mu Louisiana, U.S.A. Ndyumusha pa mukaba wa mêyi ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwîlà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)